



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com



TAPAK 9

Rahul-i Congress HQ nung mapang tali intoktsüla: Dikshit



TAPAK 8

Ni Hindi film direct asütsü: Nagraj Manjule

VOL. XIV NO. 189 (ADOK 189)

DIMAPUR

SATURDAY

APRIL 29, 2017

5.00



April 28, 2017 nü Nagaland Civil Secretariat nung Odisha Angh, Dr. SC Jamir-i Nagaland Chief Minister, Dr. Shürhözeli Liezietsu den pa indang office nung ajurutepdang agiba noksa ka angur.

CNTC-i cabinet nem tenüngsang agütsür

Dimapur, April 28 (TYO): April 25, 2017 nü state cabinet-i Rongmei kin agizükba telemetba meyipa agiba atema tenüngsang agütsür, ta Central Nagaland Tribes Council (CNTC)-i metetdaksü.

Rongmei kin agizükba atema Nagaland nung aliba Naga nungeri tim masü ta ola adok aser tang iba onük ya state cabinet-i angatetba atema kanga pelar, kechiyong state adena orr alir nem 'indigenous tribe' jenjang agütsüba ajanga tarutsü nung asenok nem timtem bener arutsütsü, ta Media Cell CNTC sangdong ka nung ashi.

Nagaland chief minister Dr. Shurhözeli Lezietsu-i kanga

shisa kaa, pa lenisüba kübok iba telemetba tajung agiba atema tenüngsang agütsür, kechiyong taoba mapang cabinet-i Rongmei kin indang telemetba agiba ajanga state nung mepetmesü tulu adok, ta CNTC-isa metetdaksü.

Maneni, Rongmei nunger 1313 ta asübaji 'administrative survey report' ka dang lir, anungji iba kuliji jungjunga bushidanger ang 'indigenous' jenjang agütsüsüla, ta parnokisa ashi.

Dr. Shurhözeli Liezietsu-i Nagaland nung aliba Naga nunger dak sendakba onüktem maneni tetsübu mesüra tejak mereprangi inyaka aotsü imlar, ta Media Cell sangdong nungsa shisem.

Nagaland nung Home Guards taa tutsür

Dimapur, April 28 (TYO): Nagaland Angh-i Directorate of Civil Defence & Home Guards, Nagaland kübok Home Guards personnel nem anogo shia duty allowance sen 150 agüja aliba nungi sen 520 ajungkettsür aser iba ya April 3, 2017 nungi tenzüksü, ta Nagaland Home Commissioner, Abhijit Sinha-i sangdong ka nung metetdaksü.

March 11, 2015 nü ken o

benokba atema Supreme Court-i telemetba agiba aser obendang agütsüba nung ajemdaker Home Guards indang taa ajungkettsür, ta sangdong nungsa shia lir.

Finance Department-i September 9, 2016 nü iba dak sendakba onük lemsatepba aser Cabinet-i April 3, 2017 nü mulunga agizükba sülen iba osang metetdaksür, ta Abhijit Sinha-isa shisem.

Angami nungeri Moatsü benjung nung shilem agütsü

Dimapur, April 28 (TYO): Ao Senden-i jaokba ama Angami Public Organisation (APO)-i anir Angami nungeri Moatsü benjung amungtsü atema May 2, 2017 nü Mokochung semdangtsü.

Taküm Aor Moatsü benjungnung nung Angami tsükong pezü nung teshimtet nübo 100 adentsü, ta APO-i Moatsü benjung atema balaka tentetba publicity committee sangdong ka nung metetdaksü.

"APO-i Naga nunger sobaliba aser inyaksangshitem akhümtsübur. Iba nung ajemdaker Ao Senden-i parnok den Moatsü benjung amungtsü jaokba APO-i pelashisia agizükogo" ta sangdong nung shia lir.

Ao Senden-i benjung nung adentsü jaokba atema kanga pelar

aser maneni Aortemi Naga nunger tsünga telongjem aser tesentaktep akangshiba indang mapa inyaka aotsü imlar, ta APO-isa metetdaksü.

Moatsü benjung nung adentsüpurtem May 2 anepdang 4:00 ako nung Kohima Local Ground nungi apusotsü. Anungji, Angami Youth Organisation, Angami Students' Union, Angamimiapfü Mechü Krotho, Angami Gazetted Officers' Krotho, Angami Sorts Association, Western Angami Public Organisation aser Southern Angami Public Organisation dena taotsüpurtem ajak mapang shitak nung tesem nung adenshitsu mepishir, ta publicity committee sangdong nung shia lir.

(Maneni tapak 11 nung...)

Nagaland nung Vehicle Inspection & Certification Centre lapoktsü

Dimapur, April 28 (TYO): Dimapur nung Vehicle Inspection and Certification Centre ka lapoktsü atema Hokolbarnü Union Ministry of Road Transport and Highways (MoRTH), Transport Department, Nagaland aser International Centre for Automotive Technology tsünga MoU ka agiogo.

Iba Centre ajanga garitem tendanga reprangtsü aser küm shia commercial garitem inspection aser verification asütsü.

Iba Centre lapoktsü atema state sorkari Chumukedima nung ali ka alizükogo aser külen Centre sorkari centre lapoktsü atema sen crore 14.4 agütsütsü lenzüktsüogo. Iba centre indang civil construction work ji ita 11 shi inyaksü aser iba sülen equipment & operation atema tender meshitsü.

Centre ji lapokba sülen



April 28, 2017 nü Transport Commissioner office Kohima nung Transport Commissioner Elias T Lotha (achiji) aser Manager Project In-charge, ICAT Ashish Kumar nati MoU agütsütepang agiba noksa angur.

commercial vehicle ajak (light passenger taxi nungi heavy goods carrier) küm shia road worthiness (fitness) inspection aser verification asütsü, ta Manager Project In-charge, ICAT Ashish Kumar-i ashi.

"Küm shia alima nung gari

lendong balala nung nisung million ka shi asür, million 23-24 shi yirur. 1986-1995 tsünga Asia kija nung gari lendong atalokba shilem 40 tashi teimba liasü" ta tanü telok asem tsünga nangzüktepba MoU nung shia lir.

(Maneni tapak 11 nung...)

FBOs dang lendong nungi jenbua alitsü osang prokshitsü ayongzük

Kohima, April 28 (TYO): Nagaland ya Earthquake Zone-V kübok züngoka lir aser ibaji ajanga lendong tulu ajurutsü ana nung lir. Iba nung ajemdaker Hokolbarnü Nagaland State Disaster Management Authority (NSDMA)-i state nung tamangba yimsü dak sendakba teloktem dang pei pei züngsem dang lendong nungi jenbua alitsü atema mapa inyaksü indang osang prokshitsü ayongzükogo.

Tanü Kohima nung aliba Ura Academy Hall nung Faith Based Organisations (FBOs) den 'Disaster Risk Reduction and Climate Change Adaption' indang sentong ka ayonga agiba nung arogo balala, Muslim aser Hindu teloktem aden.

Iba sentong nung o

jembirtemi FBOs dang lendongtsüdong nungi jenbua alitsü atema ki talanglang meyanglutsü aser ki yangludang menoknok nungi jenbutsüsa asadanga yanglutsü mepishia metetdaksü.

Nagaland Home Commissioner, Abhijit Sinha shiba NSDMA nunga Chief Executive Officer lir, pai tanü o jembidang, "nütsüng yongsük teimba akümba den külemi alima nung lendongtsüdong teimba ataloker aser ano tsüngsang mopung melenshiba ajanga lendong kanga bulur" ta ashi.

Nagaland nung menoknok tera dang anak yonga, teraksa tulu ajurutsü ana nung dang lir. Asenoki lendong nungi jenbua alitsü metettsübaji kanga

tongtipang aser iba asoshi FBOs-i disaster risk reduction aser management angazüktsüla aser ibaji pei pei züngsemtem den lemsateptsüla, ta Abhijit Sinha-isa shisem.

NSDMA atema Brand Ambassador aser Miss Nagaland 2016 2nd runners-up, Shenili Chishi-ia o jembidang, lendong nung jenbua alitsü indang metetba ajanga asenoki kitsükkirong, tüzümsüng, auer amala nungi jenbua alitsü akok, ta ashi.

Sentong nung mendenji SERO & DDMO, Rendemo Shitio liasü, Commissioner & Secretary NSDMA, Khrienuo Metha-i tesentepertem pela agizük aser OSD NSDMA Johnny Ruangmei-i anküp tepela o jembidi.

Imchen Kidong Mungdang küm 50 jungogo

Mangmetong, April 28 (TYO): Imchen Kidong Mungdang (IKM) tenteter küm tenem ajungba hon Jubilee sentong ka April 27 nungi tenzüka anogo ananü yangi Mangmetong yimdak "Penliro" omen nung ajemdaker mungogo. Iba sentong nung yimtsüng balala nungi tejaoker noklang asem shi adenshia liasü.

Sentong nung Kohima Ao Baptist Arogo Associate Pastor Wb. Sentsashi Aier, taoba MLA Wb. Nungsangyapang Aier, Environment Forest & Climate Change minister Wb. Imkong L Imchen, tsürabur Wb. Watitemjen Imchen (Longkhum), Wb. Nungsangwati Aier

(Mopungchuket) aser Bendangsangba Imchen (Dibuia) parnoki tongti shilem agia liasü.

Tatem sentong nung Minister Imkong L Imcheni mapang tatsüka agia jembidang, iba mungdang ya shinga anema masü, saka pei kin kidong tetsü tebou tarensen aser putipuin/lipoklisang jangja meteta ayuba den lungjema alitsü nükjidong yur tenzüka südi, ta pa tebilemba ka lemsatep.

Pei kidong otsüren bushiba mapang asenokia tangar indang otsürenjia agizüktsü tim, yamaji tangaria asenok otsü bushiba maparenjia tangatetba tajung nung agizüktsüla. Iba tangatetbaji lira yimsoshibaji ibaji lir, ta pai

ashi. 'Ni imlar, nisung ajak iba tangatetbaji alitsü', ta paisa shisem.

Küm tenem tashi arudang takok - tamakok aika alitsü südi saka Tsüngremi Imchen kidong ya tashi aniba asoshi Pa nem tenüngsang agütsüdi aser tang dang nungi teputepba aser temeimtepba nung aotsü asoshi paisa ayongzükka liasü.

Jubilee amungba den külemi bangzüng pungu renema ayu. Mezüngbuba nung; Chungliyimti nungi Imchen kidong aruba otsüren zülutsü research committee ka nem nungloksüba ama, hon jubilee amungba tenüng nung kakat küma zülutsü lemtet.

(Maneni tapak 12 nung...)

IPR Parliamentary Secy-i IPR ketdangsertem ajuru



April 28, 2017 nü Officer's Conference Hall, DIPR nung IPR Parliamentary Secretary tasenba, Imtikumzuk-i IPR department ketdangsertem den jembiba noksa nung angur.

Kohima, April 28 (TYO): talisa nüburttem tajungba Hokolbarnü Officer's Conference Hall, DIPR nung Information & Public Relations (IPR) Parliamentary Secretary tasenba, Imtikumzuk-i IPR department ketdangsertem aser district ketdangsertem ajurua shisalemsatep sentong ka agiogo.

Iba sentong nung jembidang pai, ketdangsertem aser department nung staff tem tsüngda amalitepa inyaksüla, koba ajanga department atema langka tajung inyaktetsü aser

talezü nüburttem tenzükba mapa lir, ta ashi.

Nüburttem nem osangtsüasang shitak agütsütsü atema department ji IPR asünungji department teinyaksü tongtibangtibaji nüburttem tenzükba nung department-i inyakba osangtem mapang shitak nung nüburttem nem metetdaksütsüla, ta paisa ashi.

Paisa ketdangsertem aser staff tem dang mapang shitak nung office-i arutsüla aser nüburttem tajungtiba agi tenzüksüla, kechiyong sorkar

tetezü nüburttem tenzükba mapa lir, ta ashi.

Commissioner & Secretary, IPR, Wopen Lotha-ia, IPR department-i nüburttem tenzükba arudar, ta ashiba den külemi Parliamentary Secretary tasenbai department ketdangsertem aser staff tem nungita tajungtiba agi amalitepa inyaksü imlar, ta metetdaksü.

Iba sentong ya Director, IPR, Limawati Ao leniba nung agi aser Joint Director, Tokishe Sema-i department-i inyakba mapatem osang metetdakja liasü.

Mokokchung nung District Task Force senden amen

Mokokchung, April 28 (TYO): April 28, 2017 nü Mokokchung Deputy Commissioner office nung Mission Indradhanush atema District task force senden amen aser weekly iron folic acid (WIFS) supplement sentong agi.

Iba senden nung District Administrations, Medical department, social welfare department aser School Education Department nungi ketdangsertem aden.

Iba senden ya Mokokchung ADC, Bendanglila leniba nung agia liasü.

Okila jembidang DPO (UIP&RCH), Dr. Tamsuyanger-i Mission Indradhanush aser iba indang mission tenzükba metetdaksüadang, iba mission ya immunization ulushitsü aser nokdangtetba tashidaktem atema

vaccine magii aliba tanurtem ajak ayimjemtsü atema lir, ta metetdaksü.

Iba mission ajanga ajak ayimjemtsü asoshi Education department aser Social Welfare Department-i shilem agia item teyari agitsü ajungshitsüla, ta paisa metetdaksü.

DPO-isa WIFS indang metetdakja, iba nükjidong ya, joko tanur tebok nung amungtsü/abentsü mapang tonger alir tetsürtem dak anemia tashidak nokdangtsü atema arishi küm 10 nungi 19 tsüngda tetsürtem dak rangloker inyaker, ta metetdaksü.

WIFS programme kübok item tetsürtem nem IFA supplements angati lemtsütsü.

Paisa Rashtriya bal swasthya karyakram (RBSK) programme indanga tongmelang agi

metetdaksü. Pai ashiba agi, school health programme kübok tanurtem atema Health screening agiba ya mapatong ka lir. Tangbo iba ya ajanga tanur kinü nungi arishi küm 19 tanurtem ajak ayimjemter. Mobile health teams aser team shiai sorkar aser sorkari yariba school tem nung kaketshirtem aser Anganwadi tanurtem atema health screening agitsür, ta paisa shisem.

Kasa sentong nung Dy. CMO, Dr. Kibangkumba-ia RBSK indang metetdaksü.

RBSK ya kanga junga shisatetba mapatong ka lir, aser iba ya ajanga tanur kinü nungi arishi küm 19 tsüngdapur dak tashidak pezü- tanur asodang timtem, tashidak, deficiency aser matamabensaba screening agitsür, ta pai metetdaksü.

21 buba Watsü Mungdang lokti senden kaogo



NPSC züngsem, Chubala Wai-i anogo ananü Ao Women Organisation (Watsu Mungdang) sentong nung jembiba noksa nung angur. (Mokokchung Town Hall, April 27, 2017).

Mokokchung, April 28 (TYO): April 27 aser 28 anogo ananü agia 21 buba Watsü Mungdang lokti senden sentong yangi Mokokchung town hall nung "Aowli Temelenshi" omen nung ajemdaker takok ngua mungogo.

Iba sentong nung tongti o

jembirji; Ao Theological Association Director Wt. Talijungla aser NPSC züngsem Wt. Chubala Wai na liasü. O jembirtemi tensa den apet tagitsü onük aika bener arua m u n g d a n g s a n g e r t e m ayongzükba liasü.

Taruba Watsü Mungdang

item lenisüba kübok bener aotsü; tir Wt. Maongienla (Waromung), tatong tir Wt. Tamsüjungla (Mongsenyimti), tongti zülur Wt. Moanaro (Mangmetong), repsem zülur Wt. N. Amenla Lemtur (Chuchuyimpang) nungertem teloki mulunga shimogo.

Tanü Kma nung Veterinary Day amungtsü

Kohima, April 28 (TYO): Parliamentary Secretary, S. Nagaland state veterinary council-i April 29, 2017 nü Nagaland nung World Veterinary Day 2017 amungtsü aser anepdang 10:00 ako nung Dog Show sentong nung tongti tesemdangerji MLA, Dr. N. Nicky Kire asütsü.

Nikongdang 2:00 ako nung World Veterinary Day sentong nung tongti tesemdangerji Animal Husbandry & Veterinary Services

Parliamentary Secretary, S. Chuba Longkumer asütsü aser tetushi tejaokerji DAN & NBM Chairman, Dr. Longriniken asütsü.

Sentong nungsa 2017 küm best Veterinarian nem sempet agütsütsü.

Iba sentong ya Capital Convention Centre, Secretariat Plaza, Kohima nung akatsü, ta ketdangser sangdong ka ajanga metetdaksü.

RTA Dimapur-i metongshitsür

Dimapur, April 28 (TYO): Taxis aser Auto-rickshaws temzüng tasen dak sentakba nung April 25, 2017 nü osangkakettem nung Regional Transport Authority, Dimapur-i, Chumukedima nungi Medziphema tashi taxi paraji

sen 80 asütsü ta tamalen metetdakja aliba ama masü, saka passenger shia sen 40 ta metongshia züngdaksüner, ta tanü District Transport Officer & Secretary, Regional Transport Authority, Dimapur, Nagaland-i sangdong ka ajanga metetdaksü.

Sungro nung Customary Court semzükogo



April 27, 2017 nü Sungro nung SDO (C) Sanis, Nchumbemo-i DB customary court semzüksüba noksa nung angur.

Dimapur, April 28 (TYO): April 27, 2017 nü SDO (C) Sanis, Nchumbemo-i Sungro nung DB Customary Court semzüksüogo.

Iba sentong nung jembidang SDO (C)-i, customary court ya akhümtsübutsüla, kechiyong iba ya Sungro Range nung temaba court lir, ta metetdaksü.

Paisa tzükong nüburttem dang Sungro range nung DBs den amalitepa inyaksüla, kechiyong parnoki ochi obendang agütsütsü, ta

metetdaksü. Kasa sentong nung EAC Lotsu, Sanis aser Sungro nungi DB temi o tatsütsü jembia aser Sungro kübok yim trokprongla nungi züngsemtema sentong nung dena liasü.

Sentong nungsa Contractor, Renpi Ngullie-i iba building yangluba osang metetdakja liasü. Iba sentong ya EAC Aitepyong, Er. ImliAkum leniba nung agi aser Head DB Sungro, Mhonrao Kikon-i tepela anküp o jembia liasü.

Aadhaar no sayaba memelar

Dimapur, April 28 (TYO): sayaba memelar," ta University Grants Commission (UGC)-i sangdong ka ajanga "Aadhaar (Targeted Delivery of Financial & Other Services) Act, 2016 ajanga Aadhaar number yimjak/lokti nung

metetdaksüogo, anungji kaketshirtem indang Aadhaar number osangkaket nung adokba mesüra yimjak nung sayaba UGC-i memelar, ta ketdangsertemi osang ka ajanga metetdaksü.

AR-i prangpong shibelener ka apu

Dimapur, April 28 (TYO): Osang tejangia ka lazükba sülen April 26, 2017 nü Headquarters IGAR (North) kübok 32 Assam Rifles sepaitemi police densema mita aodang Veterinary Colony, Burma Camp, Dimapur nung nisung ka puogo, ta tanü Assam Rifles sangdong ka nung metetdaksü.

Assam Rifles-i mita aodang Burma Camp, Dimapur nung alir arishi küm 24 nisung ka

tenüing agi, Nurul Huk ket nungi Pt 22 mm Pistol ka den magazine apu. Asüngdangyadang pai prangpong shileneba mapa inyakba nangzükogo, ta kasa sangdong nung shia lir.

Maneni bushisingdangtsü atema pa den pa ket nungi apubatemji East Police Station, Dimapur ket nung agütsüogo, ta kasa osang ajangasa metetdaksü.



Agartala, Apr 28 : Hokulbarnü Agartala nung TET ajanga shimer tesayurtemi 'regular pay-scale' meshia takhangba agüja yimyim ayima nokdakba mapang tangokba noksa nung angur.

Congress telok nungi Itanagar MC züngsem 23 BJP dangi meyip

Itanagar, April 28 (Agencies): Itanagar Municipal Council (IMC) nung Congress telok nungi züngsem 25 liasü, saka parnok 23 BJP telok nung oa denogo.

IMC nung züngsem 30 lir aser parnok züngsem 26 bo Congress telok nungi liasü, saka züngsem ka par telok nungi indokba sülen Congress nungi IMC nung züngsem 25 liasü.

Parnok züngsem 23 BJP nung oa adenba sentong nung Chief Councillor, Kipa Kaku aser Deputy Chief Councillor, Tarh Nachung-nati anir parnok züngsem 20 oa aden aser züngsem asem maparen balala aliba ajanga iba sentong nung medetet saka parnoki tezüluba nung agütsü. Iba sentong nung Arunachal Pradesh Chief Minister, Pema Khandu aser state BJP tir, Tapir Gao nungera arua aden.

Arunachal Pradesh nung Khandu-i aniba BJP sorkar dak

temolung alemer aser parnok aliba tesem nungi Parliamentary Secretary, Techi Kaso den parnok dena lir, ta Councillor temi ashi.

State BJP tir, Gao-i parnok pelashishia agizük aser parnok BJP nung arua adenba asoshi kanga pelar ta ashi.

"Tang nungi nenok ajak BJP züngsem lir aser asenok ajak külemi longjemer Itanagar atema kisüng masü saka state ajunga atema terenlok bener arutsü asoshi yaritepa inyaktsü," ta Gao-i ashi.

Parnok züngsem 23-i BJP dangi meyiptsü molungtetba pela agizüka jembidang, "Prime Minister Narendra Modi lenisüba nung BJP telok ya balaka lir," ta Chiem Minister, Khandu-i ashi.

"Iba telok ajanga linük tejangraba mezüng südaktsür aser kija tejangrabatem tesü südaktsür. Nükjitung tejangria yur, BJP ajanga terenlok tasen

bener arutsü asoshi inyaker," ta Khandu-i ashi.

State sorkar asoshi mapa inyaktsü tongtipangtiba ji capital complex yanglutsü ya lir, ta Khandu-i Councillor tem dang metetdaksü.

"Itanagar aser Naharlagun yimti ya jakrep ama lir aser iba yimti ana ajanga Arunachal Pradesh indang tejak sayur. Capital complex yanglutsü asoshi ni IMC nungitsü aser teyari agütsütsü," ta pai ashi.

Iba sentong nung Cabinet Minister, Wangki Lowang, local legislator, Techi Kaso, BJP state tatong tir, Kenyir Ringu, BJP City president, Tarh Soping aser BJP tongti zülur (Org), Ramesh Kharaganchi nungertema arua aden.

Shimla Municipal Corporation (SMC) election agitsü anasa Congress lenir 65 den parnok busemer aika BJP nung oa adenba sülen iba terenlok ya angur.

Hatigaon nungi shishilembar bua bener aoba kümzükogo; doctor ka dena nisung 9 bua lir

Guwahati, April 28 (Agencies): Nagarbera, Kamrup nung ghonda 30 bushisüngdangba sülen Assam Police indang CID temi shishilembar Ashraf Khan kümzükogo.

Ashraf Khan ya Sijubari, Hatigaon nungi April 21 nung

bua bener ao. Iba ken o nung doctor ka aser tetsür ana tensema parnok 9 bua lir.

Ashraf aburtem ya Abdul Mannan, Lutfur Rahman, Kalam Ali, Mohammed Ali Jinnah, Muzammil Haque, Runuma Begum aser Rajina Begum

ta jangjaogo.

Nisung aburtemi Ashraf taküm alangzüktsü atema sen crore 5 meshi. Nisung aburtem ya Northeast tesemtem nung prangpong shibelenba maparen nung dena lir südi, ta police temi temolung malemer.



Agartala, April 28 : Hokulbarnü Agartala railway station-i Tripura Chief Minister, Manik Sarkar aruba mapang tangokba noksa nung angur. Hokulbarnü Manik Sarkar-i Agartala nungi Kumarghat tashi passenger train ka indang 2nd Class coach nung mener ao.

ACKNOWLEDGEMENT

I, **Shri Atu Zumvü**, NPS, Sub-Divisional Police Officer, DEF Kohima alongwith family members would like to sincerely convey our heartfelt gratitude to the following individuals, organisations, Government Officers and Departments and media fraternity for your valuable felicitations with words of motivation and encouragements through various media on the occasion of conferring Ashoka Chakra Series of National Gallantry Award "Shaurya Chakra" to me by the President of India on 6th April 2017 from Rashtrapati Bhavan, New Delhi.


Your relentless support and appreciations will remain a source of inspirations for me and my family even in the days to come. We may not be able to thank each and everyone personally but God knows your good deeds and pray that, every one of you is blessed with more knowledge and wisdom.

1. Shri, P.B Acharya, Hon'ble Governor of Arunachal and Nagaland.
2. Shri .Y. Patton, Hon'ble Minister (Home) Nagaland.
3. Shri, Rajiv Mehrishi, Home Secretary, MHA, New Delhi.
4. Shri, G.Mohan Kumar, Defence Secretary, Ministry of Defence Government of India, New Delhi.
5. Angami Gazetted Officers Krotho, Kohima.
6. Chiecha Razou Kehou.
7. Chiechama Officers Krotho, Kohima.
8. SSP and all ranks of DEF Kohima.
9. Dr. Hotokhu Chishi, State Nodal Officer, Dr. Arenla Walling, District Nodal Officer and the entire team of NTCP Kohima.
10. Indian National Gallantry Award winners Association Kohima.
11. Zumvü's Chienuo krotho, Chiechama and Nachama.
12. Village Council Nachama.
13. Benreului Baudi, Peren, Nagaland.
14. Kelingmen Senso Union, Dimapur.
15. Town Baptist Church, Chumukedima.
16. Angami Youth Organization, Kohima.
17. Northern Angami Youth Organization, Kohima.
18. Chiechama Students Union.
19. Mrs Neidonuo, Ex-President NMA, Midland Kohima.
20. Shri Hekim Meru, President of Benreului Baudi and ZPO Dimapur.
21. The North East Today, Shillong.
22. The India Times, New Delhi.
23. Nagaland Post.
24. Eastern Mirror, Nagaland.
25. Morung Express, Nagaland.
26. Chakhro Gazetted Officers Krotho.
27. All well-wisher and friends from various social online blogs from within and outside state.

For the online interview while in Delhi and for making wide publicity in print and electronic media.

Sd/-
Shri Atu Zumvü, NPS,
Sub-Divisional Police Officer,
& family members Kohima.

Ukhrul nung lenmang teyangludak nokdang



Imphal, April 28 (Agencies): Manipur nung Ukhrul district kübok Poi nung lokti tentetemi tang teyangludak gari lenmang nung contractor-i construction inyakyim alema inyaker ta aija gari lenmang yangluba nokdangogo.

Iba lenmangji kanga mejungi yangluba video ka yasüng nungi prokshidar. Video nungji 'black top' yokba sülen 'black top' apo-poa yokbaji kakteta adoker aser onken adokba sayur.

Iba video ji ajanga 'base course layer' maliba, 'subgrade layer' memerükba aser 'surface layer' ji inch kata

majungba jungkai adoka sayur. Poi councilor, AS Themreishang-i ibaji ashishia ADC aser contractor den senden ka ayongogo.

Ajisüaka Dungrei junction, Ukhrul nungi Talui ajanga Tadubi tashi yangluba lenmangbo nisung aikati social media nung junga agizükogo.

Iba tesem nung alirtemi aiben ahangba sülen 2015 küm kilometre 115 talang lenmang yanglutsüji agizük, aser Road, Transport & Highways Ministry kübok NH and Infrastructure Development Corporation-i sen crore 1600 intoka yanglu.

Assam nung tanur anema ken o bulur

Guwahati, April 28 (Agencies): Assam nung tanurtem dak ozüng alema azüabongba ken o kanga bulur, aser 2015 küm state nung Protection of Children from Sexual Offences Act (Pocso Act) kübok ken o 542 benoka liasü.

Item kenotem rongnung shilem 93 (ken o 505) bo aibelensangji tanursang

kinüngertemi meteta liasü, ta police ketdangser kati ashi.

Item rongnung ken o timtibaji Dibrugarh district nungi liasü aser tanabuba aser tasembuba nung Morigaon aser Kamrup district na liasü.

2015 küm Posco Act kübok Northeast nung ken o 3,949 aser ken o timtibaji Assam nungi (2,835) liasü.



TIR YIMYIM

YIMOBILEM (EDITORIAL)

DIMAPUR SATURDAY, APRIL 29, 2017

Aor telongjem sabang

Telongjem ka nung tensa mapang tajung-majung ajak nung akok tashi kenbang-obang medemer yimten, loktiliba aser sobaliba maparen ajak nung lirodema aotsü nükjidong nung Aor ajak telongjem sabang asütsüsa Ao Senden tenteta lir. Atangji, iba sabang ya Aor sendendak asünungji Aor dak aketba ken o tasak aser temela ajak benoka jembidak aser alangdakdak lir. Anungji, iba sabang nung jembiba ken o ajakbo tepela o masütsü mesüra tarütsü o a masütsü. Aji oda, Ao Senden ya Aor ajak peladaksütsü tentetba telongjem ka masü saka Aotsür Aortemi junga inyaknü tenüng asangtsü aser majung inyaknü arütsütsü aser merenshitsü aser tensa tia ajak nung ajungshitepa linük asoshi inyaktsü tentetba telongjem ka lir. Iba telongjem yagi Aor ajungtsü asoshi dang masü saka Naga nunger yimkong ajungtsü bilema jembitsü aser inyaktsü khuret tuluka pongloka lir. Ibaji asenok ajak asoshi kanga tekümdangtsü lir, kechiyong kechi mapa aser mapang nung südirsüaka tangari Aori kechi inyaker aser Ao Sendenia kechi ashir ta asübaji tama repringner aser metetner. Iba ama khuret tulu benloka alinungji, Naga nunger rongnung Aor senso shiai tangar dang nungi khuret talila kakabosa abentsüsa adoker. Atangji, iba tenlaji rongsen dangbo masü saka Aotsür Aor taküm, nübo aser shisatsü asütsü. Iba tangatetba nung Naga nungertemi Aotsür Aor leniba nung temulung lema anidaksüsa Ao Senden lenirtemi anir Aotsür Aor ajak alitsübaji kanga tongtibang teinyaktsü mapa ka kümogo. Aji oda, Aor yimten aser loktiliba meraketa yunüdüng Ao Senden aiben telemtetba tasak agitsüsa akümer aser iba ama telemtetba jagi aika yirur. Ajisüaka, kar mulungjang yiru tsüba yimten telemtetba takang ka magitet yutsüra, iba jagi yimten aser lokti telongjem tashimait atentsü. Ibayongji, ochi nungbo yimtenbo tenük amur shinga tsütsüa mereprangi telemtetba shitak agitsüsa akümer. Ibayongji, tanü ama nisung ajak nem kechi jembiner aser züluner jembidaktsüba aser züludaktsüba putu nung aikati Ao Senden ama, pei yimten aser külem telongjem, lokti sabang anema jembiba angashir aser züluba angur. Ibajia tim kechiyong tanübo yimteni pei senso bang nembangtsür yimsüsüba putu masü. Iba jagi anogo shia asenoki kari mesüra karibo government anemba osang angashir aser iba jagi dang government-a tashi aiter. Ajisüaka, tanü putu nung senso shiai metettsüba mapa kaji senso shia nem temeten agütsüba temeten ya pei jembinütsü aser pei inyaknütsü inyaktsü agütsüba temeten ka masü saka yimten, lokti aser alima ajungtsü asoshi sademsadema jembitsü aser inyaktsü temeten agütsüba lir. Iba khuretji meteta Ao kin mechi nung pei tangutsü tim süaka magi arema aser pei agitsü tim süaka magi arema Ao senso shiai tenla agütsütet nungbo iba jagi Ao kin wangshitsü. Asenok asoshi tia majung kaji aiben asenoki ajak temulung ka ser telemtetba magitetter, ajisüaka aji tim dang lir, kechiyong alima nung nisung aika rongnung ajaki mulungba nung telemtetbabo aiben magitetsü. Iba jagi democracy yimya ajanga teimbai mulungba nung shimtsü aser agitsü ta yimten inyakyim metongmetonger ka lateta lir. Anungji, kadang yimten aser lokti nung teimbai mulungba nung telemtetba agiadokdir akok tashi züngsem ajaki iba telemtetba nungji adentsüla. Tanübo aikati Ao Senden yimtsüng nung putu mendeni inyakba ama Ao senso ka merenshitsü makok ta jembir. Ajisüaka, asenok ajaki metettsüba kaji, Ao Senden ya Aor yim ajak nungi tatar yimsüsürtem adenshia akümba Aor sabang ka lir. Anungji, Ao Senden temzüng nung kechisa lateta lidir, item ajakji Aor yimtsüng shia nungi putu tartatem adenshia latetba lir. Iba amaji Ao Senden ya tashi tulu aketba telongjem ka kümogo. Iba khuretji meteta Aotsür Aor shiai Ao Senden aitsütsübaji masü saka Ao Senden meraketsütsü bilema inyaktsüla. Ao Senden mera aketba agi Ao kin aser Aor mera aketer aser kadang asenok meraketdir asenok ket nung yimten tashi aser ali rongsen ajak kar ta bilemdi.

OLEMSABANG

Nükmen nung aibelenra Nükmenchir

- Talitemjen Imchen

"Nükmen Nung Aibelenra Nükmenchir" ta kenteta jembitep zükba ya tsürabur shiba shisa tajung agi shisatetar, tetsüngmangtsü ka lir. Iba kentet yabo alimaji kechi koma ka melenshia yimsoshiba aruyonga, kechi nung lokti tenteta lidir nungdaksüba tapet kentet ka lir. Kodang nükmen nung aibelendir, yongsen mapaji timchi adoka metemteteter aser yongsen osetji amshitsü majunger. Timchi oset kaji, kidang yudi ta asünunga kinünger densema menütsütsüba, rongdokdi ta asünunga nübuttsük aika lir asünung tapayutsüka. Iba jagi yongsen mapa inyakeri nükmen tenzükdang kanga kümdanga tenzüker.

Tangar oset nunga nükmen aser tetenzüklen lir. Asenok ajaki tangar oset amshir. Parnok oset nungbo tanang chitetter aser jangrapangra saputepa amshir. Saka pei oset nung tanang chitetba kangabo mali aser aika saputepa jangratema amshiba mangur. Asenok ajaki kanga shisadangtsü nungdaker. Pei oset nungji nükmen junga metenzüker asü mesüra asen shisatsü nung ano lanu asüba agi junga mamshiteterar ni mejangja. Saka kati ka nem tabensaba shisatsü agütsüba ajanga kinük pezülen nungi Aor aser Naga nunger nükmen yanglushitetsü aser tejangjaba aotsü tamang akar.

Mezüng Dr. Clark aser Godhula nunger Molungkimongi atur Ao lima senzüba mapang, Aori company nisungtem ta temolung melemi bilembaji, tanü aseni shisadanga Aor ji zülutsü aser azungtsü dang maliashi, temetetba tsütsü nungjibo tuluka tenük lapokadoker liasü ta meteter. Yamaji Molungkimong nungi Molungyimsen yim tasen akümbaji, Oct. 24th 1876 ta yimer aser alima otsü nung jangjaa lir. Kaketreju tenzüker aruba küm 2003 nung 125 ajongba benjong, Molungyimsen yimtak AKM President Wapong Imotemjen Longchar aliba mapang, AKM-i ayongzuka Quasquicentennial amongbaji ni dang masü, iba mapang kaketshirtem aser alimai meteta lir. Aser kaketshirtem dang masü tesenteper ajak kanga temoatsü ngur senshi. Talisa Mrs Clark-i par yimtak 1878 küm school tenzüka jilushi Molungyimsen Lanurtemi sayuba ji repringdang, asenoka Mrs Mary Mead Clark-i kaketriju nung sayur ama kanga jangratema repring.

Iba sülen, 2006 küm tatemlen ka, taoba Chairman Ao Senden Literature Board, Late Sosangmeren par kidang kü taküm nung mezüng süa ajuru. Küna oshiooben (literature) otsü talangka jembitep aser nia pa nungi aika angazük. Iba mapangji pai, "Naia ASLB Tentet Ya Koba Küm Ka Agi Nung Tajungba Asütsü Amai Bilemer" ta asüngdang. Ni mezüngbo 1911 küm Dr. Clark-i Ao Dictionary yangluba bilemteta jembitep. Ano yakta dang 2003 küm Quasquicentennial AKM-i ayonga Molungyimsen yimtak amongba indang bilemteta ashi. Tanüa kü tangatetba jibo, ASLB oshiooben tentet ji 1878 küm ya aginer. Kaketriju tenzüka (formal education) kümji magira, shisaliok tsütsü nung yaksü (marking) yoka bentettsü asaktsü amai nibo bilem.

Iba sülenjibo 2013 küm ASLB tamaittsü (insignia) nung ASLB Estd. 1876 ta zülur angu. 2003 Quasquicentennial amongba küm o ASLB Estd. 1876 naji meputeper. Tangji küm ana agi nükmenchi adoka lir. Tarutsü nungbo nükmenchiji tuluba akümtsü nibo tsübuttsür. ASLB Estd. 1876 ta agitsüsa bushizüngdangertemi molung süa ngur lirapang kanga junger. Saka yamaji melirapang ASLB tentet ji melenshitsüla aser 1878 küm ji asütsüla.

Tarutsü asen oshi aser sobaliba tali tejangjaba nung wazüka ayutsü atema, Ao Oshi nükmen (subject) nung Aor aser Naga nunger indang General Knowledge agitsü nungdaker. Tatishitsü kar sobaliro (history) yimya nung sayudanger.

1. Mokochung District Naroküm Tenüng - Samanir yimti (the land of pioneers)
2. Christianity Tenzükba Yim Aser Küm - Molungkimong, 1872
3. Kaketriju Tenzükba Yim Aser Küm - Molungyimsen, 1878
4. Mezüng Kaketriju Tesayur - Mrs. Mary Mead Clark
5. Mezüng Ao Lima Sayutsünger - Godhula Rufus Brown
6. Mezüng Christian Yimküm Aser Küm - Molungyimsen, Oct. 24th 1876
7. Mezüng Ao Osep Adokba Küm - 1911
8. Mezüng Ao Osep Zülur - Dr. Edward Clark
9. Mezüng Mission Center - 1872-1876, Molungkimong
10. Tanabuba Mission Center - 1870-1894, Molungyimsen
11. Tasembuba Mission Center - 1894- till date, Impur.
12. Tatempang Buba America Missionary - Mrs & Rev. R. F Delano
13. America Missionarytemi Impur Doktsüba Küm - February, 7th 1955
14. America Missionarytemi Mission Melenzüka Doktsü - Rev. L Kijungluba.

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

TENÜK-TELEN TABENSA TAKÜM KAJI KODA JANGRATEMSÜ LIR.

- R. Imkong Lkr., 4th Mile, Diphupar

(Yashi adok nungi...)

Aser ano tia maka nisung karbo tasodang nungi tenük poker asor, saka karbo yiruyipongba agi tenük poka akümer. Item amala tia majungertemji junga alirtemi kanga meimtsüla.

Bilemdangang nüpkokertemi ayangi mouteter anungji pa/la tepok mesütsü atema meshimetsüa jajadang karibo meimaa bilemer aser pei akaba nungi lemsateper aser meshi-metsür tu-a pelaset kiburtem nungi ayazüka aoer. Yamaji parnok tu kibong kwika dangi meshi-metsü-i atu parnok nungi teka tazüng meyoker. Ni bilem nung asen teyanglur Tsüngremi-a ibala ama mapa tajung inyakba nungji pelaa alitsü ta amanger. Saka iba amala meshi-metsür-temji tapu asem tashi lemsatsü akok.

Mezüngbuba meshi-metsürji azümesen nisung, parnok tenük-telen abensaa tashi itaa lir, saka meshi-metsü-i aoer. Tanabuba meshi-metsürtemji tenük-telen junga aliyongbo parnok tashidak tamajung jagi mapang talangka shiranga manemi aliba nisungtem lir aser parnoki joko tangar anema alirtem ama khen agi meinyaktetter, saka aya agi mesünüba agi meshi-metsütsüa akümer, parnokji ajaki meimtsüla. Tasembuba meshi-metsür-temji tenük telen mabensa, kar tetsüng teben majung mabensa, kar tenük tapoktem ta alir, item purtemji ajaki aria bilemstüla aser yaritsüla.

Aser ano nisung aika tain akümdang tepo "teeth" temesüng ser tajinütsüka aliba tu mapang ka nungbo ayanga ngua aiter, aser shi aon "meat curry" soa aliba nung tu ano teret lanu jangratemtsüka suteta alir aser item tu khreb, khreb ta mejaka nguzüka jangratema chiyungtsü melena, tepo ayanga ngua aliba tu tera kongshi majung anünglaki joketa tua ayaku atener aser tenük nungi nüktzü memeteti alur atar.

Akhi mapang tepo junga alidangbo kechi chiyungtsüa ngudir kanga nangnanga mejakrepa chiyunga aruba tu bilemtet-dang ano iba mapang tu khen meyipa arudaktsünüali tasa kanga sasaset bilemer. Saka tang mapang yabo tepo ka mesüra ana lokshishia angodang "paining" doctor bushia oagi pei indang tepo tu ka mesüra ana endokdaksür sen aika züngzüka agütsür külen tejak sorupangru tu tera melener tereprangnüsüka kidangi shilanger aser kidang alirtemi pa mesüra la tu angudang benjong tulu agia asaya menüteper saka tepo maketsang mesüra maketla tubo ain adokdaksür.

Tanabuba nung kibong kar nungbo tebur chanu, Asangur dang pungu-terok tashi alir, tetezü Aiür tetsür ka danga sosema malir, aser ibala ama kibong nungji tetsür mapa adokdang teburtem jagi inyaksüsa akümer. Anungji item tsüraburtem dangji tebur tebu mesüra tebur tetsü tasa ajar. Aser ano kibong kar nungbo tetsür chanu, Aiür tasa meja meja pungu-terok tashi alir aser item amala kibong nungji tetsü atemabo teyarir onsara ali nungji ayong-ayonga alir. Saka tebu yarirbo ka danga mali nungji tebur mapa adokdang Aiür-tem jagi tebur mapa aika nungbo meyariteter, anungji item amala tsüraburtem dangji tetsür tebu mesüra tetsür tetsü ta-sa jaa angashir. Anungji tebur Asangur kisüng aliba kibong o tetsür Aiür kisüng aliba kibong ana taji bilemdanga asadanga shi aon tajung sozüka yur, metsü mersü agi meperi-i asoba aon mesüka jangra matem liyonga aoba angur. Saka item ajak ya Tsüngremer sentongtem lir ta metettsüla mesüra angatettsüla.

Ano tera rajemtsü mechi nung yangi o ka shiner, oda shir kibong nungsa tetsür Aiür meja-meja lidir, iba kibong nungji tebu-ji tekolak tabo ajar saka mapang mapang tensa agi bener arutsüdang tebu tekolakba tu tekolak kangasa menüdaksür aser tebu tu tezü atsüa ain adokdaksür. Aser ano tangaba kibong nungi tebur Asangur dang meja-meja pungu-terok tashi ki tasüng mendepa yur chiyungtsübo meyi mapang anentsü anenzüka aoba ama chibo-enbo kerak ta azüngteta yutsüba angur, saka olangla mapa nungbo shingaia meyarir ta liyonga aodang khen khen-bo tetsü tu ain adoka dance-sa süa jokdener, tetezü kanga jungasa jokdena tsüngsanger, aser ibaji ngua kinungertem tu ajak ajem-ajema mendeper ha, ha, ha, ha tasa menüteper. Koda hau asü nunga? Idangji tebu tua densema yariseama menüba nungji adener, iba sülen-jibo kidangi tetsü yarisemdaktsütsü mechi nung Asangurtem tu agi parnok shia Aiür ka ka anir arua liyonga aor. Idangjiibo par/lar kibong nung tu tebu o tetsü nati anir tebur jabaso terok den jala aiür sentsü tapu balala terok, ajak agibo teri ana 12 den tebu o tetsü na ta par 14 teri-pezü litepyonga aodang parnok kidang tu Ak nem agütsüba chi amatu kerahi nung tu chi-o-aoun na meyoktepa sorochiokba tu khen agi kerak ta azünga chiyungteper kelen pelatepa longsu longsua liteper.

Aser tanü-asüng balaka alima ya tejakleni kanga karaa aor asünungji tetsür, tebur ajaki school aser college nung tu 'kungfu-karate self defence' atema ta ser training tajung agia kanga junga takok ngua pass süteper-sa alir asü nungji par Aiür terok tu kelen aser Asangur terok tu kelen ta ser asayatepdang kima kishi o sünglang kishi na tu apzüka tsüngzüka metsüzüka yoker. Idangji tebu o tetsü na tu ajem ajema mener tanurtem asayatepba tu tebang kaar repringasa ataar. Aser tetsü o tebu na tu yamai jembiteper, akhi mapang tubo Deobar nü town tuagi sen tasak agi cinema ticket alir tiyazü tsüngtepba-sa repringa kazür aonung ayaterm mapang nung yimdaki-sa meyipa aruyaa liasü. saka tangbo asen kidang ki kilong nung kishi aser window asangsang nung tsüngzüka metsüzüka yoker, iba den mi apudak mishi dena metsüdoker, ya koda tesüngmangtsü! parnok tetsüng teben ya merang ama temerangsa alitsü saka süng, lung dang nungibo temerangbasa alitsü ta süngmangseta repringer. Saka parnok chiyungtsübo ak nem agütsüba amatu tang chiyungteper ser nung ya koda tasa süngmangteper. Aser kelen parnok ya school, college nung yamaisa junga angazüker asü no? ta süngmangseter. Aser tang yabo tetsü tu ain adoktsü khen agi mapangi bener marutsür, saka pelaset dang alir.

Tanü asüng loktiliba tapu aika lir aser loktiliba tentet shiaji tenük-telen abensaa shimer. Yamaji yimdak yimtsüng nunga putu menden ka nung kin kidong tabensa nungi tenük-telen abensaa shima yur nübur madak yimsü süyonga jangratema liteper aser iba nungji azük arua yimchiyimjung nung liyonga aoba angur.

Yamaji tamangba yimsü tsütsülena Arogo ka nung pastor kati anir Deacontem putir mapa benzüka nütsüng nüburtem den tajungtiba nung Arogo kaji yimsü süa bener aoer. Aser parnok den yariteptsü atema Mapangsertem peria shima ayur, iba den par potang tennük-telen abensaa shima ayur aser ano tenyatemponger tema aikasa Arogo yari shima ayur aser Arogo kaji tashi ita bener aoer. Iba den nütsüng nüburtemi Arogo ka taji angateta telongjem nung, rongsen nung, yaritepa anidakba ajanga iba Arogoji kanga tashi ita ajak nung takok ngua bener otet-ter. Aser iba takok angubaji tanga kecha agia masü, saka tangatetba aliba den telongjem nung kati ka akhüm agütsütepa, züngshitepa khuret ajak lemsatepa bener aoba agi Arogo kaji taküm alir. Aser Arogo kaji rongsen nung peria tashi ita takar liaka par kedangser-tem tsüngda nung tangatetep tajung melira par Arogoji tashi mitdi akümstü aser laoa doktsü ana nung lir. Saka kibuba tsüngda tagizükter tsüsa lira, iba Arogoji ajanga nüburtem aiak kotaki anitsü aser aji pai mulungba aser pa taginübaaji ibaji lir.

Rajemtsü atema:

Arogo kaji taküm lidaktsünera nisung shia-i pei-ji pei sasa kangabo mezüngshitsüla aser tenüngsang meimlatsüla, saka medemerji kechi tia nung ali aji jangja metet-tsü tim. Anungji tang iba lima Arogo kaji takok angutsü aser yangertettsü. Amen.

ANO GO ABEN TSÜNGREM DEN

DAWID SARASADEMBA

O Tsüngrem, kü dak bushiang, aser kü mulungjang metetangma. Ni tendangang, aser kü tebilemba metetangma. Aser kü dak; lenmang tamajung kar danga repringang; aser teti tatem maka lenmang nung ni aniangma.

- T. Ken 139:23, 24.

Ibai Dawid sarasadem. Temenen nung belemseter Tsüngrem bushiba lenmang aisü nungi taitüsü tejenbulen maka tatempang teimlaj i Tsüngrem ta bushia aruba. (T. Ken 38: 18.)


"Hau, ni kü tai nangzüker, kü temenen asoshi ni jashiseter" Ajak tendanger, menakdang, jajadanger, O Tsüngrembosa Tsüngrem, Pa majangi tepela, tesünep, takok, yimji-yimjung, taneptsü maka. Anungji tamadokba jabaso ama dang Tsüngrem bushia aru. Dawid-i ashir, kü men en asoshi ni jashiseta ni kü tai nangzüker, Ano paisa ashir, "kü dak bushiang, kü mulungjang metetangma, ni tendangang"

Dawid ama asenokia asen menentem bushiba, bilemtettsü mapang agir asü masü. Tangar dang angur asü asen menen bushia ya majunga tajashia Dawid ama nangzüker? Tangar asoshibo mapang angur, asen asoshibo mapang mali ta asimungbo kenü anogo kanga sasatsü, jashitsü saka menuadoker asütsü. Dawid-ibo mapang yangpong nung Tsüngrem bushi aser iba Tsüngrem nem taküm rangpen bendanga agüja sarasademba yangi angur.

SARASADEM:

O Kibuba, kü dak temulungjang tasen ka poktetdakjang süra ni Nü den tatem maka lenmang nungjajatsü. Amen.

Russia tenlaki nung Pokemon Go asayaba atema merenshir



Ruslan Sokolovsky-i All Saints Cathedral kima tangokba noksa.

Moscow, April 28 (Agencies): Russia nung nisung kati tenlaki ka nung Pokemon Go asayaba atema Russian state prosecutor kati pa küm asem ser tesadang atema pa tepuokdak ayutsü ken o benok.

Arishi küm 22 tain, Ruslan Sokolovsky ya Russia nung nungtugu blogger ka lir aser pai yaküm August ita tenlaki ka nung pa Pokemon asayaba indang video ka online nung sayua liasü.

Iba tenlakiji Yekaterinburg nung lir aser iba tesem nung 1918 küm Russian tsar tatemubaba aser pa kibong pset.

Video nung Sokolovsky-i Pokemon character ka den Yisu Khrista medemdanga jembia lir aser pai ashiba agi, osangkaket ka nung pai tenlaki nung Pokemon asayartem dang senchi achitsü mesüra tepuokdak ayutsü ta züngshiba agi pai tenlaki telung nung asayatsü mulungtet.

Iba video prokshiba sülen Russia obendangertemi Sokolovsky dak tai tongloktsü. Pai tamangba yimsü sempatsü ajungmesor ta tai tongloktsü.

2012 küm Pussy Riot punk band-i Russia President Vladimir Putin anema 'cathedral protest' ayonga agiba mapang parnoka kasa onük nung tai tonglokja liasü.

"Iba ken o nung aibelena alisang dang kecha meshii yutsütsübaaji tim masü. Pa dang senchi achitsüla aser okadaka pa küm 3 ser tesadang tepuokdak

ayutsü temerenshi agütsütsüla" ta okatsür kati tanü okadak mepishi.

Sokolovsky ya taoba mapang pre-trial detention center ka nung ayu aser tang pa 'house arrest' nung lir.

"Ni kanga aoksar. Ni tepuokdak liogo, ni idakji ita asem dak tali liasü aser molumii aoba kishizüng ama liasü" ta tanü Sokolovsky-i okadak ashi.

Külen, Amnesty International-ibo Sokolovsky apubaji 'freedom of expression' anema inyakba mapa ka ta aitsüogo.

"Russia nung tenlaki ka nung Pokémon Go asayava atema nisung apuba ajanga ketdangsertemi 'freedom of expression' hau ta maliba sayur" ta Amnesty International otongdar, John Dalhuisen-i ashi.

"Sokolovsky-i akhümtsübu mesüi mapa inyak ta nisung karibo ashitsü akok, saka sorkartemi tamangba yimsü dak kongshiba tenüng nung nisungtem tepuokdak mayutsüla" ta paisa ashi.

Ano külen, Russian Orthodox ketdangsertemi Sokolovsky-i inyakba mapa aitsüogo saka pa tepuokdak nungi chiochtsü atema parnoki mepishia metetdaksü.

"Onoki tekong meranga metokteper saka iba mesükba inyakyim ajizüka meinyaktsüla" ta Russian Orthodox Archbishop, Metropolitan Kyrill-i ashi.

Iba ken o atema okadaka May 11, 2017 nü obendang ka agütsütsü.


OLONG PAITEP # 4406

1			2					3		
4							5			
						6				
			7							8
		9								
							10			
11							12			
13										

TIPILEN		LANGTSÜNGLEN	
2. Teka tanük - (8)		1. Teka nung enokba oset ka - (7)	
4. Anakshinüa ait - (5)		2. Teptsü - (4)	
5. T _ _ _ _ zük - (4)		3. Nok amshia raratep - (6)	
9. Aria bilemtep - (7)		6. Ninang tulu ka - (4)	
11. Kidang metsüba ozü ka - (4)		7. Nüji masü - (4)	
12. Tzuma aser ali nung aliba shiruru ka - (5)		8. Taruba küm - (7)	
13. Teka kolepdak - (8)		9. Teka shitok - (6)	
		10. Süoshi agi mapet - (4)	

OLONG PAITEP # 4405 TELANGZÜBA

TIPILEN :	LANGTSÜNGLEN :
1. Alang, 3. Pakti, 7. Bangka, 8. Sar, 9. Menungrar, 10. Pen, 14. Kümzük, 15. Anema, 16. Kimen.	1. Amena, 2. Aibelen, 4. Ayak, 5. Tenyar, 6. Ngs, 8. Sangküm, 9. Menden, 11. Kilen, 12. Aküm, 13. Ama.



TAWA TANÜ OLULU AJANGA AADHAR CARD BULUA BUSHITEPER

Sir, Tangarbo Aadhar Card ya Bank nung meshir ta angazüker aser ano sorkar mapa inyakertem ibala card ya mali nungbo itasen magütsüsü ta angashia tawa tanüka kanga aritepa iba card ya bushiteper... anungji nia kidanger alu nung ni sünütsü tema temelaba nüngdaker.

Hi, Alok... na kechi atema Aadhar Card nüngdaker?? Kangabo shisa tebulu..

Sir, Aadhar ta asüba ya kü nem ka agüjang!!!

Alok, na shisa tebulu, ibaji Bank nungi kodanga meshia mali aser ibaji olulu dang lir, anungji parnok ajak dang shisa tebulu ta shiang!!

Lilir IS, Dimapur

TANÜBO NAI LANGZÜANG

Q: Dr Babasaheb Ambedkar International Foundation Kerala State award shibai angu?


- [A] Prabhat Kumar
- [B] Ajay Pandey
- [C] Neelam Juneja
- [D] Dileep K Nair

(Taruba adok nung onoki langzüsü)

YASHIADOK TELANGZÜBA : China

Happy Birthday

TENUNG. : JAMIDI
 Tasoba anogo : 29/04/2011
 Kum : 6
 Class : UKG
 School : Maple Tree
 Tebu tenung : Sentiyanger
 Talidak : Landmark, Dimapur.



Temeim Jamidi (Eshoba), Tanü na küm 6 ajungba tepela birthday salem abener. Yisui na kanga meimer, anungji nai PA dang tashi angaba ajanga pa akhümtsübuangma, süra Yisui na moatsüsü.

Fr- Temeim Ala.

Tanur asoba anogo nung salem osang den noksa angati adokdaksünura - Tenung, Kum, School, Talidak & salem osang tejanga zülur, noksa (photograph - any size) ka den anogo 3 mesüra 4 jela e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



1. Tenung :
2. Tasoba anogo:
3. Kum :
4. Class :
5. School :
6. Talidak :
7. Salet osang :

NAIA YA METETER MA

DOCTOR ZÜLU

UK nung doctor kati shiranger ka atema Amoxil tablets (amoxicillin) zülutsüba noksa nung angur. Pharmacist-i doctor zülüji junga mezüngteti Daonil (glibenclamide) mozü ang agütsü, iba mozüji chir shirangersangji teti atema tekolok raksa. Doctor tem zülu majungba kuli ajanga küm shia nisung 7,000 dak tema asür.

(Source Internet)

SUDOKU # 3519

TELANGZÜBA # 3518

7	9	4	6	3		9	2	8	3	5	7	1	6	4
	6		5		9	8			6	7	1	9	4	8
	5	3				1	4		3	4	5	6	1	2
4				7	8				2	8	3	7	6	4
	7		2	1	6				4	6	7	5	9	1
3	2			9			7		1	5	9	8	2	3
6	9	7	1			4	3	5	7	9	2	4	8	6
8				4	5	7	9		8	1	6	2	3	5
		1		3	9	2			5	3	4	1	7	9


OJANG LUTEP # 4011

- BURTSÜRATEMI :
- KRENECHISAA :
- AKAJ :
- ÜTAKBTAKZONGA :
- AKARUTAA :
- NDATENGA :
- ERAS :
- NGTASÜETA :
- YONLIGA :
- UAR :


OJANG LUTEP TELANGZÜBA # 4010

SHIRNOKI TANÜ AJUNG DANG BILEMA INYAKER PARNOKJI TARÜTSÜ ATEMA MULUMI


Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):

- 


Aries
21/3-19/4

Tanü nai mapa ka nung ajemokang aser iba mapa takok mangu tashi meranga inyaktsü merangang.
- 


Taurus
20/4-20/5

Tanü nü mapa nung tanger teka aita inyakba ajanga tajangzük mangutsü. Anungji nü kisüangi dang inyaktsü merangang.
- 


Gemini
21/5-20/6

Tanü tangar nungi shisa agiang aser medemertem den mapang indok nung ajungtsü, saka nü mapa mamatoktsüla.
- 


Cancer
21/6-22/7

Tanü kinunger aser medemertemi na nungdaktsü, anungji nü mapang kanga junga lemsatsüla.
- 


Leo
23/7-22/8

Tanü nü mapa nung medemertem teyari agitsü merangang. Nai medemertem teyari mongura, nü kisüangi meranga inyakang.
- 


Virgo
23/8-22/9

Na asoshi tasak ta bilemba mapa kar tanü nai inyaktsü merangang, saka nü kisüangi temolung agüja inyak tajungba asütsü.
- 


Libra
23/9-22/10

Tanü nisung aika parnok mapa nung mazüangi alitsü aser iba ajanga na asoshi timtem malitsü. Tanü nü mapa inyaktsü mapang tajung asütsü.
- 


Scorpio
23/10-21/11

Tanü nür medemertem pai wadang nung nokdaka alitsü. Anungji nü kisüangi temolung agüja nü mapa aser na asoshi inyaktsü mapang tajung asütsü.
- 


Sagittarius
22/11-21/12

Tanü nü mapa nung tangar teyari agitsü tebilem. Nü sempet amshia mapa tem inyaktsü merangang, aser nai takok angutsü.
- 

Capricorn
22/12-19/1

Tanü nai nü mapa inyaktsü asoshi tejangraba balaka arutsü. Mapang tajung alangzükang aser nü mapa nung takok angutsü.
- 

Aquarius
20/1-18/2

Tanü nai zülubanglu mapa nung temolung tali agütsüba tajungba asütsü. Tanü nai inyakba mapatem tarutsü nung nungdaktsü.
- 

Pisces
19/2-20/3

Tanü nai nü mapa nung temolung agüja inyaktettsü. Anungji nai tamalen meinyaktetba mapatem kar tanü inyaktsü merangang.

Billboard Latin Music Award 2017: Shakira aser Nicky Jam nati sempet timba agizük




Miami, April 28 (Agencies): Brihotisbar nikongtsütsü Ritz Carlton, Miami Beach nung 2017 Billboard Latin Music Award sentong agiogo.

Iba sentong nung nungtugu kentener aikati shilem balala agia kanga mera keta mungtetogo aser taküm tetoktepba nung Nicky Jam-i Billboard Latin Music Awards trok anguteta, teimba angu.

2017 Billboard Latin Music Award tongti angurtem:

OVERALL ARTISTS CATEGORIES		Music	Latin Pop Songs Artist of the Year, Solo: Enrique Iglesias
Artist of the Year: Juan Gabriel	Latin Airplay Imprint of the Year: Sony Music	Latin Pop Songs Artist of the Year, Duo or Group: CNCO	Latin Pop Airplay Label of the Year: Sony Music Latin
Artist of the Year, New: CNCO	Latin Digital Song of the Year: Nicky Jam, "Hasta El Amanecer"	Latin Pop Airplay Imprint of the Year: Sony Music Latin	Latin Pop Albums Artist of the Year, Solo: Juan Gabriel
Tour of the Year: Marc Anthony	Social Artist of the Year: Jennifer Lopez	Streaming Song of the Year: Nicky Jam, "Hasta El Amanecer"	Latin Pop Albums Artist of the Year, Duo or Group: CNCO
Crossover Artist of the Year: Justin Bieber	Albums Categories Top Latin Album of the Year: Juan Gabriel, Los Duo 2	Albums Categories Top Latin Album of the Year: Juan Gabriel, Los Duo 2	Latin Pop Albums Label of the Year: Universal Music Latin Entertainment
SONGS CATEGORIES		Latin Compilation Album of the Year: Various, Las Bandas Romanticas de America 2016	Latin Pop Albums Imprint of the Year: Fonovisa
Hot Latin Song of the Year: Nicky Jam, "Hasta El Amanecer"	Hot Latin Song of the Year, Vocal Event: Enrique Iglesias featuring Wisin, "Duele El Corazon"	Top Latin Albums Artist of the Year, Male: Juan Gabriel	WRITERS/PRODUCERS/ PUBLISHERS CATEGORIES
Hot Latin Songs Artist of the Year, Male: Nicky Jam	Hot Latin Songs Artist of the Year, Female: Shakira	Top Latin Albums Artist of the Year, Female: Selena	Songwriter of the Year: Horacio Palencia Cisneros
Hot Latin Songs Artist of the Year, Duo or Group: Banda Sinaloense MS De Sergio Lizarraga	Hot Latin Songs Label of the Year: Sony Music	Top Latin Albums Artist of the Year, Duo or Group: Los Plebes del Rancho de Ariel Camacho	Publisher of the Year: DEL World Songs, ASCAP
Latin Hot Latin Songs Imprint of the Year: Sony Music	Latin Airplay Song of the Year: Enrique Iglesias featuring Wisin, "Duele el Corazon"	Top Latin Albums Label of the Year: Universal Music Latin Entertainment	Publishing Corporation of the Year: Sony/ATV
Latin Airplay Song of the Year: Enrique Iglesias featuring Wisin, "Duele el Corazon"	Airplay Label of the Year: Sony	Latin Pop Categories Latin Pop Song of the Year: Enrique Iglesias featuring Wisin, "Duele el Corazon"	Music Producer of the Year: Saga Whiteblack

Deepika, Sonam aser Aishwarya nunger Cannes Film Festival nung adentsü



Mumbai, April 28 (Agencies): Taruba ita 70 buba Cannes Film Festival nung India nunger actress- Deepika Padukone, Sonam Kapoor aser Aishwarya Rai Bachchan nungertem adentsü.

Aishwarya-i 2002 aser Sonam-i 2011 nung Cannes nung ajemoka liasü aser Deepika-i taküm nungi iba benjung tulu nung mezüng tetstung ajemoktsü.

Par asemi cosmetic brand L'Oreal Paris ajungkettsür aser iba film benjungnung nung maneni L'Oreal Paris ajungkettsütsü.

Par asem den Hollywood celebrity ana- Julianne Moore aser Eva Longoria nungertemi L'Oreal Paris tenüng nung shilem agitsü.

"Aishwarya Rai Bachchan, Deepika Padukone aser Sonam Kapoor nungertemi taküm Cannes Film Festival nung L'Oreal Paris aser India tenüng nung shilem agitsü. L'Oreal Paris-i Cannes atema official makeup partner asütsü tenzüker taküm agi küm 20 ajunger aser iba jagi taküm benjung ya khenyongi balaka asütsü" ta L'Oreal Paris General Manager, Raagjeet Garg-i metetdaktsü.

Cannes Film Festival ji May 17 nungi 28, 2017 tashi amungtsü.

TAN HOPTA ATEMA - KOMA SÜLA ?

Q. Taruba election nungbo constituency shia nung political party aser Independent party shia Fund Raising Committee shima candidate yari nunga koma süla?

Olong 20 shi nung April 28, 2017 tashi nung iba telangzüba ya onok dangi
 e-mail - tiryimyim@gmail.com mesüra SMS - 9856121232 / 9436072422 mesüra Tir Yimyim Facebook account ajanga yokang. Telangzübatemji taruba Hokolbar nü adoktsütsü.

Ni Hindi film direct asütsü: Nagraj Manjule



Mumbai, April 28 (Agencies) : Marathi film "Sairat" direct asüsang, Nagraj Manjule-i, khenbosa Hindi film direct asütsü, ta ashi.

Brihostibarnü Mumbai nung

92.7 Big FM-i pa nem Maharashtra indang 'Icon of the Year Award' agütsü aser pai iba sempet agütsüba sentong nung megastar Amitabh Bachchan den külemi inyaksü akok ta olen ka ashi.

"Tang tangbo ni ajunga meshitetsü. Ibai jembitsü ano tera karara. Ajisüaka tarutsü nung khenbosa ni Hindi film kabo direct asütsü," ta pai ashi.

Hindi aser Marathi film industry tem lokteper inyakba nung terenlok aketba indang jembidang pai, "Film tajung kija yanglu tashi industry koba den südir süaka lokteper inyakba maparen nung timtem malutsü," ta ashi.

Sempet anguba sülen Nagraj-

i, "Meranga inyakba atema sempet angudang nema tanga bilemer. Asen tebilemstüji asen mapa atema asütsüla. Nü mapa junger ta tushiba temaitsü tangari nü nem sempet agütsür," ta ashi.

"Sempetji nü mapa junger ta agizüktetba aser tushiba temaitsü lir. Sempet ajanga nü mapa tuluba mekümdaktsür, ajisüaka mapa nendaka inyaksüji asen tebilemstü amai nibo bilemer," ta paisa ashi.

"Kü tenünga film industry nung director tajungtem rongnung tetshiba asoshi kanga pelar. Küm paika ya iba industry ya parnoki tejakleni anir aoe aser nibo iba nungji shilem tila ka nungang dena lir, ta Nagraj-i shisem.

Ronan Keating o kinungtsü na nem jabaso ka moatsüogo



London, April 28 (Agencies) : Kentener Ronan Keating aser kinungtsü Storm Keating na mezüngbuba tanur aruogo. Tena jabaso ka agi sosema aküm.

Tenati iba osang tajung Instagram ajanga metetdaktsü aser iba nungji Ronan-i pa kinungtsüi jabasoji ajunger menürema tangokba noksa ka inokja lir, ta osangbenertemi ashi.

"Jabaso ka moaba osang

kanga pelashishia metetdaktsür. Kinunger ajaki kibong nung züngsem tasen aser tilatiba kanga meimer! Iba jabaso tebu asütsüsa mangoka anguba ya temoatsü ulura aser iba tashi tait aser temulung tajung tetsürla kinungbo asüba ya ni asoshi kanga tia taka," ta Keating-i ashi.

Ronan bo mezüng kinungtsü Yvonne Connolly den tanur asem tashi lir -- jala Missy aser Ali na den jabaso Jack. Ronan aser Yvonne na ya 2015 küm bala.

Film yanglur Madhur tespetsü tasa asaba atema Model Preeti Jain küm 3 tepuokdak ayutsü

New Delhi, April 28 (Agencies) : Film yanglur, Madhur Bhandarkar tepsettsü tasa asaba ken o nung Mumbai nung okadak kati model Preeti Jain den nisung ana aitsüogo.

Bhandarkar-i la den shi nung medemer nangzükba meinyak ta tai tongloksüla, Preeti Jain ya 2005 September ita nung apu.

Preeti Jain-i 2005 küm tangar nem taa agütsür Bhandarkar tepsetdaktsütsü merangba ajanga Mumbai civil aser sessions okadaki la küm asem tepuokdak ayutsü obendang agütsü.

Preeti Jain-i underworld don asüba politician kümer alisang Arun Gawli nem taa agütsür Bhandarkar tepsettsü ashiba atema la apu.

Lai Gawli atema inyaker ka



nem mezüng shilem sen 70,000 agütsü. Ajisüaka ano Gawli atemasa inyaker ka, advocate Bagawe-i iba osangji Jain-i tamalen la nem film nung shilem agütsütsü ta shir la tashiyim agi raksatsüba atema Bhandarkar puang ta ashiba police ka dang ashiba sülen temai adok.

Jain-i police dangi züluba shidi nungji, "Bhandarkar-i la nem film nung shilem agütsütsü ta shia la den shi nung aiben medem, ajisüaka pai nangzükba ama meinyak," ta lir. Laisa ano Bhandarkar-i la dangi iba dakji sendakba nung yokba SMS tema sayua liasü.

Sen 5,749 jenjang Zen Admire Metal 4G smartphone India nung sayaogo

April 28, 2017 (Agencies): India nung smartphone yanglur, Zen mobile ajanga Admire Metal smartphone sayaogo aser iba ajanga ZENERATION 4G tashi taitba kümdaktsür.

Admire Metal nung ya SIM ana amshiteter aser 5-inch HD IPS display lir. Iba smartphone indang processor ya 1.3 GHz quad-core aser 1GB RAM keta lir. Iba phone nung internal memory ya 16GB lir aser

microSD ajanga 32GB tashi inoka amshitetsü. Iba smartphone indang 'operating system' ya Android Marshmallow 6.0 lir.

Admire Metal phone tesülen auto-focus dena 5-megapixel camera lir aser tejaklen flash dener 5-megapixel Selfie camera lir.

Iba phone nung Value Added Services (VAS) keta lir aser Twin WhatsApp lir, koba ajanga

WhatsApp account ana tashi lapoka amshiteter. Iba Admire Metal nung India nung indang oshi 22 inoka lir, Motion & Gesture, Swalekh Keyboard aser 4G, Wi-Fi, Bluetooth nung amshiteter.

Zen Admire Metal smartphone indang battery tashi ya 2,500mAh lir. Iba phone 'Champagne' aser 'Metallic Grey' sentsü nung angur aser sen 5,749 ahi angutsü.



Bengaluru, April 28 : Movie reprangtsü jangra tantsür-tambur telok kati Bengaluru nung 'theatre' ka kima "Bahubali 2: The Conclusion" movie reprang metenzükdang selfie agiba mapang tangogka noksa nung angur. Iba movie ya Hokulbarnü India aser alima tesem balala nung 'theatre' meyirjang aika nung sayuogo.

India nung mobile amshir million 895.258 lir

Mumbai, April 28 (Agencies): India nung telecom industry nung terenlok ya anogoshia ainer aser 2017 March ita kisüng nung mobile alir million 5.68 liasü.

Cellular Operators Association of India (COAI) ajanga sangdongba nung 2017 küm March ita tashi nung India nung mobile amshir million 895.258 jungogo aser item rongnung Reliance Jio Infocomm Ltd indanga tensema lir.

2017 küm March ita tatem tashi nung Reliance Jio maten mobile amshir nisung million 823.10 lir, ta TRAI ajanga metetdaktsü.

Telecom company rongnung Bharti Airtel amshir timba lir. Iba network amshir ya March ita nung tasen million 3.00 liasü aser iba network amshir ajak agi nisung million 273.65 jungogo.

Airtel sülen ya tanabuba jenjang nung Vodafone lir aser iba network amshir nisung million 209.06 lir. Idea Cellular amshir million 195.37 aser Reliance Jio amshir million 72.158 lir.

Telecom market nung Bharti Airtel indang shilem 33.25 lir.

COAI ajanga India linük ajunga nung mobile amshir asadanger aser iba telok ajanga bushitetba agi March ita tashi nung UP East nung mobile amshir million 75.10 lir.

Maharashtra ya tanabuba jenjang nung lir aser iba state nung nisung million 70.63-i mobile amshir aser tasembuba jenjang nung Bihar lir. Iba state nung mobile amshir million 70.03 lir.



March ita nung mobile network tasen nung tenüng zülüoker timba ji West Bengal aser Andaman & Nicobar Island tem lir aser item tesemtem nung tenüng tasen zülüoker million 0.86 liasü.

"India nung 'telecommunication' tsütsü 2017 küm March ita kanga renlokogo. Tenüng tasen zülüoker timba akümba ama linük nung tesem ajunga nung mobile amshir renloka aor. Iba terenlok ajanga sorkar indang 'Digital India' sentong kinük ajunga nungi amshitetsü," ta COAI nung Director General, Rajan S Mathews-i ashi.

"Andaman & Nicobar Island tem nung 'subscriber' timba akümba ngua temolung nung tajungshiba ka arur. Item tesemtem ya India linük nungi talangka bilar lir, saka item tesemtem nung mobile amshir timba akümba ajanga item tesemtem nung mobile indang osettem renloktsü sayur. Iba terenlok ajanga tarutsü anogotem nung 'Digital India', 'Skill India' aser 'Make in India' sentongtem nung teyari tulu angutsü," ta Rajan-isa ashi.



New Delhi, April 28, 2017: Hokolbarnü New Delhi nung Minister of State for Communications (Independent Charge) & Railways, Manoj Sinha-i kulisüa repranga atadang telok asem- Posts, BBNL aser BSNL tsüingda tezüingzüktep ka agiba noksa nung angur.

J&K nung yimtenren party tem den jembitsü melunga lir: Centre

New Delhi, April 28 (Agencies): Hokolbarnü Centre sorkari Supreme Court (SC) dang, Jammu & Kashmir nung tang tensa bentettsü atema state nung recognised yimtenren party tem den ken o jembitsü sorkari melunga lir, ajisüaka separatists denbo ken o mejembitsü, ta metetdaksü. Attorney General (AG), Mukul Rohatgi-i, recognised party temi ken o jembiba nung shilem agitsü melungra ken o jembitsü, saka separatist denbo

mejembitsü, ta ashi. Jammu & Kashmir High Court Bar Association-i, Centre sorkari Kashmir tensa bentettsü atema mera agia meinyaker ta jembibaji tiyazü, ta Attorney General-i Chief Justice J. S. Khehar, justices D.Y. Chandrachud aser S.K. Kaul nungeri akumba bench dang ashi. Rohatgi-isa, tawa Ato kilonser, Narendra Modi aser Jammu & Kashmir Chief Minister, Mehbooba Mufti na

senden ka mena state tensa indang jembio, ta metetdaksü. SC bench-i Jammu & Kashmir High Court Bar Association danga, state tensa süngjemtsü atema May 9, 2017 nü tashi nung tebilemba onüktem benokang, ta tuyuogo. Bench-isa bar association dang, Kashmir nung tensa süngjemtsü atema nenoki asalentong kar benokba ajanga tongtibang shilem ka agitettsü, ta ashi.

Rahul-i Congress HQ nung mapang tali intoktsüla: Dikshit

New Delhi, April 28 (Agencies): Congress lenir tain aser taoba Delhi Chief Minister, Sheila Dikshit-i, Congress tatong Tir, Rahul Gandhi-i tetsü, Sonia Gandhi-i nüburtem nem mapang peria agütsütetba ama paia inyakttsüla, ta ashi. "Ni Rahul Gandhi nem nüburtem atema mapang tali intokdaksüner," ta Delhi Chief Minister asemen tashi inyakla, Dikshit-i ashi. Dikshit-isa, "Rahul Gandhi dak lenir dak aketba sempet ajak lir, saka pai linük yimtiba nung aliba party office (headquarters) nung mapang taliba intoktsüla," ta ashi. Tesüiba mapangtem bilemteta Sheila Dikshit-i, küm 19 tejaklen Sonia Gandhi Congress Party Tir akümba sülen lai anogoshia Congress headquarters nung ghonda ana-



atembo mapang intoka aruogo, ta ashi. "Yamaji Rahul-ia inyakttsüla," ta laisa ashi. Lai ashiba agi, lai ashiba ama Rahul-i inyak nungbo Congress headquarters nung teti nisung longsoa mazüingi alitsü. Arishi küm 79 tain, Dikshit-isa, Rahul Gandhi dak lenir ka dak aketba sempet tajung aika lir, saka pai pa inyakyim melenshitsüla, ta ashi. Tamalena Dikshit-i, party

tatong Tir (Rahul) ano shisatsü junga main, aser ano mapang nüngdaker, ta jembia liasü. State aika nung Congress jenjang kechiba mejungi akumer ta asüingdangba langzüdang Dikshit-i, "Yimtenren oshi kanga melenshiogo. Iba ama temelenshi mapang ka nung Congress-i jenjang yanglutsü merangdar. Rahul ano shisatsü junga main, pa arishi küm nunga tanur. Pa arishi küm 40 tema dang lir. Pa nem ano mapang agüjang. Aluyimertem atema bilemja inyakbabo Rahul dang lir," ta ashi. Rahul Gandhi nem mapang kobika agütsütsüla ta asüingdangba langzüdang lai, "Pa lenmang talangka jajaogo. Pa ano Ato kilonser maküm, kechiyong iba maongkaji tesülen arutsü, pai pa teinyakttsü inyakdar," ta ashi.

Linük nung ochimeshitiba state ji Karnataka lir

New Delhi, April 28 (Agencies): India linük nung ochimashi jenjang kanga ajema kümogo, ajisüaka taoba küm ka tsüingda nüburtemi public service balala atema sübokrem agütsüba senji crore 6,350 liasü, ta bushisüingdang ka ajanga bushitetogo. CMS-Indian Corruption Study (CMS-ICS) 2017 ajanga ashiba agi, 2017 küm survey agiba kibongtem shilem 43-i taoba küm ka tsüingda public service nung ochimashi tali kümogo ta ashi. 2005 küm nungbo shilem 73-i public services nung ochimashi tali kümogo, ta telangzüba agüja liasü. Iba bushisüingdang ajanga, police aser judicial service densema public service balala nung ochimashi jenjang ajema kümogo, ta bushitet. 2017 küm state 20 nungi public services 10 nung sübokrem agütsüba senji crore 6,350 shi lir ta asadangtet. 2005 küm nungbo sübokrem senji crore 20,500 tashi liasü. State aika nung sübokrem agütsüba, sen 100 nungi sen 500 tashi lir, ajisüaka kar nungbo sübokrem senji sen 10 tashiaa agütsüogo.

Police service nung sübokrem agütsüba shilem 34 liasü, iba sülen land/housing (shilem 24), judicial (shilem 18) tax (shilem 15) aser PDS nung shilem 12 liasü. Iba bushisüingdangba nung state 20 kübok yimtsüing aser jilatem nung aliba kibong 3,000-i shilem agia liasü. State 20 nungi public service balala nung kibongtemi ochimashi ajangshibaji Karnataka nung timba (shilem 77) liasü, iba sülen Andhra Pradesh nung shilem 74, Tamil Nadu nung shilem 68, Maharashtra nung shilem 57, J&K nung shilem 44 aser Punjab nung shilem 42 liasü. 2005 küm kibongtemi ochimashi timba ajangshibaji Bihar nung shilem 74, J&K nung shilem 69, Odisha nung shilem 60, Rajasthan nung shilem 59 aser Tamil Nadu nung shilem 59 liasü. Iba bushisüingdang ajangasa bushitetba agi, 2017 küm public services nung kibongtemi ochimashi tajemtiba ajangshibaji Himachal Pradesh nung shilem 3, iba sülen Kerala nung shilem 4 aser Chhattisgarh nung shilem 13 liasü.

India aser Cyprus nati tezüingzüktep 4 agi



New Delhi, April 28, 2017: Hokolbanü New Delhi, Rashtrapati Bhavan nung sentong ka ayongzüka Cyprus Tir, Nicos Anastasiades (tiyong) agizükba sülen pa den Ato kilonser, Narendra Modi aser Tir, Pranab Mukherjee nungeri osangbenertem den jembitsü atema aoba noksa nung angur.

New Delhi, April 28 (Agencies): Hokolbarnü Ato kilonser, Narendra Modi aser Cyprus Tir, Nicos Anastasiades nati linük ana tesendaktep aser regional onüktem nung o lemtepa sülen, linük ana tsüingda air services aser merchant shipping nung amalitepa inyakttsü densema tezüingzüktep pezü agiogo. Osangbenertem senden nung külemi jembidang Modi-i, India-i tongtibang onüktem nung Cyprus nungita arur aser parnok yimsüsüba, telongjem aser litsüa nungiter, ta ashi. Linük ana tsüingda tesendaktep aser regional den International onüktem nunga o lemtepa ta shia Ato kilonser,

Modi-i, "Tesem nung rara adokdaksür, rara nungiter aser tejenokdak agütsürtem anema linük ajaki longjemer inyakttsü nüngdak ta künati bangjemogo," ta metetdaksü. Linük anatisa United Nations Security Council (UNSC) nung ozüingtem yanglushitsü nüngdak ta bangjemogo, ta shia Modi-i India-i UNSC nung permanent züingsem akumtsü atema benokba nung Cyprus-i nungitba atema pelar, ta metetdaksü. Tanep External affairs minister, Sushma Swaraj-ia Cyprus lenir ajurua liasü aser iba senden nung linük ana tesendaktep onüktem jembia liasü.



Patna, April 28, 2017: Tawa Sukma district nung Maoists telungpurtemi tepsetba CRPF sepaitem nem akhüm magütsüba anema Hokolbarnü Bihar yimtiba, Patna nung NDA züingsemtemi state Chief Minister, Nitish Kumar aser Minister tem anema longkak aitba noksa nung angur.



Pasay, April 28, 2017 : April 28, 2017 nü Myanmar State Counsellor Daw Aung San Suu Kyi Pasay city, metro Manila, Philippines nung aliba Manila International airport tonga arundang honour guards-i la nem akhümtsübu agüja agizükba noksa nung angur.

Iran:Arrtsü anüker tepsetba atema Pakistan diplomat jaok

Islamabad, April 28 (Agencies) : Taoba hopta Pakistan aser Iran arrtsülen amakba mapang Iran nunger arrtsü anüker nisung 10 tashi tepsetba atema Hokolbarnü Iran Foreign Ministry-i Iran atema Pakistan diplomat yoka alisang jaok, ta osangkaket ka nung shia lir.


nung security kanga junga mali aser Islamabad-i tamalen onok dang nangzükba ama iba ama amakba anendaktsütsü onoki imlar," ta Iran Foreign Ministry atema otongdar Bahram Qasi-i Ambassador Asif Ali Khan Durrani dang ashiba osangkaket nung shia lir.

telungpuri amakdang tajemba agi nisung 10 asü. Tarutsü nung iba ama lendong mataloktsü mechi nung Iran-i Pakistan dang security akangshitsü shiogo, ta kasa osangkaket nunggi lir. "Iba ama kiralongrar mapa inyaka nisung tepseterem pua merenshitsü asoshi Pakistan sorkari tashi ita inyaksü onoki imlar," ta otongdari ashi.

"Tia makai Pakistan tsütsü aliba Iran arrtsü tesemtem

Iran kübok Sistan aser Baluchestan province nung

North Korea den rara tulu adoktsü akok:Trump



tulu ka adoktsü. Aji ataloktsüsa," ta Brihostibarnü Trump-i osangbenertem den jembiba mapang ashi.

ashi. Iba osang ya South Korea Finance Ministry atema taoksatsü osang ka lir aser South Korea Finance Ministry-i, linük ana tsüngda shishilemba tenangzüktep tsütsü US nungi kecha temepishiba onok dangi maru, ta osangbenertem dang ashi.

Washington, April 28 (Agencies) : US Tir Donald Trump-i, South Korea den 'free-trade' tenangzüktep anentsü aser North Korea den rara kangasa tulu ka adoktsü akok, ta ashi.

Onoki iba ya tangatettep tajung agi bentetner saka ibaji inyaksü lenmang kanga mesüa aser saaka kümogo, ta pai shisem.

Trump-i iba osang metetdaksüli South Korea Kospi index SEU, -0.18%-i alu. South Korea nunger export tsütsüa kanga mejungi kongshi. Gari yanglur Hyundai Motor Co, 005380, -2.04% , 2% agi tajemba aküm aser LG Electronics 066570, -4.43% -a 4.2% agi tajemba aküm.

Donald Trump Tir mendeni tur anogo 100 ajungnü osangbenertem den jembiba mapang pai, North Korea den nuclear tebilemstü yimjung inyakyim ajanga bentettsü imlar, ajisüaka rara tulu kabosa adoktsü amai bilemer, ta ashi.

Secretary of State, Rex Tillerson-i, North Korea den olempet akatsü mulunga lir aser onoki par yimsüsüba yimya nung teka maitsü, ta ashiba anogo nung Trump-i item o jembia liasü. Tir, Trump-i, South Korea den küm pungu atema 'free-trade' tenangzüktep yua aliba jembishitsü mesüra anenatoktsü kechiba süra linük ana tsüngda shishilemba nung takoksa tulu adoka lir, ta ashi.

Ano Trump-i, North Korean ballistic missiles nokdangtsü asoshi tang U.S. military-i sen billion 1 alangba THAAD anti-missile system amenokba sen South Korea-i agütsütsü imlar, ta shisem.

"Ni tekaratiba nung iba inyakyim anenba sangdongtsü," ta Trump-i osangbenertemi asüngdangba ka langzüdang



Warsaw, April 28, 2017 : Hokolbarnü India Tatong Tir, Wb. M. Hamid Ansari-i University of Warsaw, Poland nung lecture ka agütsüba sülen kaketshirtem den jembiba noksa nung angur. Noksa nung Minister of State of Small Industries, Giriraj Singh-a dena angur.

US Labour Secretary atema Acosta shimogo

Washington, April 28 (Agencies) : US Senate-i Donald Trump indang Cabinet nung Labour Secretary asütsü asoshi Alexander Acosta shimogo, ta osang ajanga metetdaksü.

Department tekolak asütsü mapa agizük. Trump-i iba mapa asoshi mezüng benokba nisunggi restaurant executive, Andrew Puzder liasü, ajisüaka Andrew-i February ita nung thitsüba ajanga pai thitsür tananüsa Acosta tenüng benok.

Labour Department lenitsü asoshi Acosta ya Trump-i bilema aliba tanabuba nisung lir aser pa nem iba mapa Brihostibanrü benloktsüogo. Iba mapa asoshi vote sütepba mapang Acosta 60-38 agi takok angu.

Puzder-i pa ket nung Republican telok nungi pusemer aika malitsü ta shisatetba sülen pa tenüng meyipa agi.

Vote agitepba sentong ya Tir Donald Trump Tir mendeni tur anogo 100 ajungtsü anogo ka lia agi, ta osangkaket nung shia lir.

Iba sülen ano US Trade Representative asütsü asoshi Trump-i shimba, Robert Lighthizer tenüng Cabinet ajanga shimtsü aser ibai parnoki shimtsü aliba tesüsabuba menden asütsü, ta osang ajangasa ashi.

America nung mapa inyakterem tebilemstü agi sünga akümba mapang ka nung tesüiba mapang National Labour Relations Board (NLRB) nungi Republican züngsem, Acosta-i Labour

Senate Finance Committee-i Lighthizer tenüng Mongulbarnü agizüka yuogo aser pa nomination Senate rangbeni agizüka ayu.



Mosul, April 28, 2017 : Hokolbarnü Mosul, Iraq nung Islamic State (IS) aser police na raradang raksaba ki ka ajanga Iraq Federal Police ka jaja aoba noksa nung angur.

UK:Kiralongrar mita aoba mapang nisung 4 apu

London, April 28 (Agencies) : London aser Kent, England tesem nung kiralongrartem mita aoba mapang nisung pezü apu aser ka yirutsü, ta Hokolbarnü Metropolitan Police-i metetdaksü.

ka nung anir oa yaridar. La kanga mejungi yiru ajisüaka taküm samatsüsabo masü, ta police-i ashi.

Ketdangsertemi, Brihostibar aonung mita aoba mapa ya taoba mapang Westminster nung nisung kati pa yangkhu nung kotari aika bena lia apuba den sendaktepa mali, ta osangbenertem dang ashi.

Willesden nung tebur ana, ka arishi küm 20 aser ka arishi küm 16 tain, na den tetsür arishi küm 20 tain ka dena apu. Ano Kent nung arishi küm 43 tain ka apu.

Iba mita aoba mapang Harlesden Road, Willesden, northwest London nung ki kati aidang arishi küm 20 shi tain tetsür ka police indang injang agi yirutsü.

Scotland Yard-i ashiba agi, parnok ajak ya kiralongra mapa inyaksü tenyaba aser sentong yangluba dak sendakba nung temulung melemi bilemba nisungtem lir.

Iba tetsür indang tenüng mesüra la kechi nungi, itemji memetdaksü saka la mozü ki

Brihostibarnü pua alisang, arishi küm 27 tain tebur kaji kiralongra mapa inyaker nisung ta temulung melemi bilema apu. Pa ket nung lendong agütsüba osettem lir ta temulung melemi bilemer aser pa dang tashi mechioki yua lir.

Italy nungi Islamic Kiralongrar ana aridok

Rome, April 28 (Agencies) : Italy nung ketdangsertemi jihadist telok pusemer ta temulung melemi bilemba North Africa nunger ana linük nungi aridokogo, ta Hokolbarnü Interior Ministry sangdong ka ajanga metetdaksü.

yimti nung document shitak melii liasü aser pa Palermo airport nung tayimtsü ka nung yok, ta ministry-i ashi.

Tena rongnung mezüngbubaji arishi küm 32 tain, Tunisia nunger lir. Pa ya Sicilia kübok Ragusa

Tanabubaji arishi küm 27 tain, Egypt nunger ka liasü. Pa a Lazio kübok Latina jila nung document shitak melii liasü. Pa Fiumicino airport, Rome nungi linük toktsür odaktsü, ta kasa sangdong ajanga ashi.

Manipur Congress MLA 4 BJP nungaden

Imphal, April 28 (Agencies): Manipur nung Congress MLA pezüi Hokolbarnü Bharatiya Janata Party (BJP) nung denogo. Par pezüji Y. Surchandra Singh, Ngamthang Haokip, O. Lukhoi aser S. Bira nungertem lir.

Tanü BJP office nung Manipur Chief Minister N. Biren Singh aser state unit president K. Bhabananda nati par pezü pelaa agizük.

Yashi Arunachal Pradesh nunga Itanagar Municipal Council (IMC) nungi Congress party councilor 25 nungi parnok 23-i BJP nung aden.

Itanagar nung Chief Minister Pema Khandu aser BJP state President Tapir Gao na lia councilor temi BJP nung züngsem aküm.

Nagaland nung ...

(TAPAK 1 NUNGI...)

India ama developing countries nung gari aika lenmang nung anishitsü jenjang nung mali lir. Gari tejentem anepalu masüba ajanga ali tzü-mopung menentsüba dang masü saka lenmang nung lendong bener arutsür. Iba vehicle inspection system tenzükba ajanga tzü-mopung menenba azüoktettsü, gari nungi mokozi adokba ajema akümtsü aser lenmang nung lendong atalokba tajemba asütsü, ta MoU nungsa shia lir.

Ministry of Road Transport & Highways-i India kübok state/UT shia nung centre sorkar teyari ajanga Inspection & Certification Centre ka ka lapoktsü tebilemba lir.

I&C centre lapokba nung Centre sorkari state sorkar mesüra state sorkari mapa inyaksü lemsüktsüba telok nem senotsü teyari agütsütsü. Centre lapoker küm ana sülen, state sorkari I&C centre ji pei nübo aser senotsü ajanga ketdang asütsü.

Angami nungeri ...

(TAPAK 1 NUNGI...)

Ano, Northern Angami Public Organisation (NAPO) züngsemtem anepdang 5:00 ako nung Botsa nungi apusotsü aser Chakhroma Public Organisation (CPO) pur DDSC Stadium, Dimapur nungi apusotsü, ta parnokisa metetdaksü.

Angami nunger teshimtet nübotem ajak Mokochung kübok Alichen nung senteptsü aser idakji sübosolemtsü atema mapang agütsütsü. Maneni, yartsüngsang nung shilem agitsüpurtem ajak Alichen nung rehearsal asütsü mapang agütsütsü, ta publicity committee-isa shisem.

Parnokisa, shilem agitsüpur ajak dang pei sobaliba sübosolemtsü jungjunga sübotsü aser iba anogo nung yi majemtsü atema mepishia metetdaksü.

APO-isa Mokochung aser temeket aliba district tem nung aliba Angami nunger ajak Moatsü benjung nung arua shilem agitsü mepishia metetdaksüogo.

Pelaba Lemsateper Ni rara tajungji raraogo, ni alizung tonga asemogo, ni tamangji yuogo. 2 Timoti 4:7

Aso:
20.11.1926



Asü:
19.04.2017

Onoki teti meima aliba asür Ojala **Purchila** (New Ctn) mapang tetemjen nung asen Tsüngremi iba lima nungi bener ogo. Iba asüko nung shirnokisa temeim agi, rongsen nübo aser tamang sarasadem ajanga onok den yaritepogo, nenok ajak dang kangasa pelaba lemsateper. Nenok temeim ozüi kodanga mamatsü. Asen tulusang Tsüngremi nenok mapa tajung asoshi lepa moajangma.

Temeim Chirnur, Semchir, Anükapang aser kinungertem.

TRAVELLERS INN

(Food and Lodging)

&

PAYING GUEST

Near Sumo Counter, Opposite NSF Martyr's Park
Upper PWD, Kohima, Nagaland
Contact No. : 9402489928 / 7085055769

CENTRAL COUNCIL OF HOMOEOPATHY

Jawahar Lal Nehru Bhartiya Chiitsa Avum Homoeopathy
Anusandhan Bhawan, No. 61-65 V & VI Floors,
Opp. 'D' Block, Institutional Area, Janakpuri,
New Delhi-110058.

SANGDONGER

Biochemic Education Grant Commission, Bowbazar, P.O. Krishnanagar, Distt. Nadia, West Bengal-741101 ya Govt of Indiai akümba amai sayur saka ibai taila telok ka lir ta ajak nem metetdaksür.

Iba Bio-Chemic Education Grant Commission anema Kotwali Police Station Krishnanagar, West Bengal (as notified in June, 2016 by UGC) nung University Grant Commission-i FIR ka agütsüogo. Iba ama telok nem mashiokdaksütsü atema nübortem nem metetdaksür.

Homoeopathy Central Council Act, 1973 ajanga Bio-Chemic Education Grant Commission tenteta aliba meteta mali aser parnokki agütsüba qualification-jia tamakitsü asütsü ta meteta ayutsüla.

(Signature)
(Dr. Lalit Verma)
Registrar

davp 17206/11/0001/1718

'Illegal migrant' tem meyipa yoktsü asoshi telok ka tentettsü; Rajnath

Guwahati, April 28 i iba osang sangoktsü.

(Agencies): Bangladesh nungi Iba senden ya küm 12 lir tan ozüing alema arua Assam nung alirtem bushir par limai meyipa yoktsü asoshi telok ka tentettsü, ta Union Home Minister, Rajnath Singh-i ashi.

1985 küm Assam Accord zülutepa aliba inyakyim repringshitsü asoshi Centre sorkar, Assam sorkar aser All Assam Students' Union (Aasu) külemi senden ka Delhi nung amenba mapang Home Minister-

"Assam nung aliba kaketshirtemi ashiba ama ozüing alema Bangladesh nungi arua Assam nung alirtem tanaben par limai meyipa yoktsü asoshi Home ministry aser Bangladesh sorkar tsüingta onük lemsatepogo, ta Singh-i iba senden nung ashi," ta Aasu shisalen sayur, Samujjal Bhattacharyya-i osangbener dang Guwahati nung ashi.

WAROMUNG NUNGDEN REJU CULTURAL SOCIETY MOKOKCHUNG TOWN

1992 - 2017

Silver Jubilee Sentep Sentong

Omen: Sobaliba Wazüka Ayutsü

Anogo: 3rd May, 2017

Mapang: 11:00 Ako

Tesentepdak

: Mr & Mrs. T. Tinu Longkumer,
WNRCS Kimen (Alempang Ward)

Tongti Tesemdanger :

Shri. Imkongtensü Longchar
Deputy Director, Department of Agriculture,
Nagaland: Mangkolemba

Sentong Lenir:

Sangpang Aodangnok Ozükum
Kongro L. Tiarenla Jamir

TONGTI TESEMDANGER AGIZÜKBAMAPANG

Jubilee Lapoktsür:

Watimeren Putu Zunga Mokochung Unit

1. Sarasademtsü : Rev. T. Lima Lemtur
2. Pela-a agizükba : Wb. W. Rongsen, Tir WNRCS
3. Temeja ken ka : Kongro Tiasola
4. Tepela/Tajungshi O : i. Tir, Waromung Aong Reju Cultural Organization, Kohima
ii. Chairman Waromung Village Council
iii. Wb. A. Chuba Lemtur
iv. Tir, WSTMT
5. Sangro Azüngtsü : Kongro Moalemla & Sangpang Yapangchang
6. Sobaliba ken ka : Waromung Senso Telongjem Mokochung Yimsüsür
7. Ni ya shinür : T.T Rongsentemjen Aier
8. Jubilee Kaket Sayaba Aser Tongti Temsemdanger O
9. Melepzüng O :
10. Tatem Sarasadem : Wt. T. Ayangla, Mendenbula WSTM

TEMETETTSÜ

1. Iba sentong nung Anükapang aser Sensosanger ajak WNRCS-i pelashishia jaoker.
2. Iba sentong nung Yimtsüng aser Town Unit-tem nungi nübo (2) anabosa arutsü mepishir.
3. Sentong temer Jubilee Chiyung Chiyungtsü.
4. Iba sentong takok angutsü asoshi ajaki sarasadema atadi.

Sd/-

Wb. Rongsensowa Lkr
President
WNRCS

Sd/-

Wb. Meyaliba Lkr, Convenor
Jubilee Planning Committee
WNRCS



CHRISTIAN HR. SEC. SCHOOL
HYABRO LOTHIA ROAD, DIMAPUR - 787112, NAGALAND

Acknowledgement



The Christian Higher Secondary School family would like to acknowledge the ROTARY CLUB OF DIMAPUR for their contribution of two wheelchairs towards the CHSS class for differently-abled children on 28th April, 2017.

CHSS introduced the class for differently-abled children from the 2017 academic session and presently, the lives of 13 special children are positively transforming under the caring hands of an experienced and qualified teacher Ms. Moarenla.

Sd/-

S. Moatemeu Walling
Principal, CHSS

Maria Sharapova Stuttgart asayamung Semi-i iogo



Stuttgart, April 28 (Agencies)

: Maria Sharapova-i tan Stuttgart WTA asayamung nung kanga junga asayadar. Russia tsür, tesüiba mapang World No. 1, Sharapova-i iba asayamung nung melamela semifinal tongtetogo. Lai Anett Kontaveit madak set ana atonga koker iba jenjang atong.

Estonia tsür, World No. 73, Kontaveit-i Grand Slam punguben tashi bena alila Sharapova den toktepa

masayatetba ajanga arishi küm 30 tain, Sharapova-i iba asaya minute 83 asayaba sülen 6-3, 6-4 agi akok.

Meldonium mozü achiba ajanga ita 15 tashi tennis masayadaksütsü nokdangtsür aliba tan mezüngsüa iba asayamung nung asayar aser lai ano set ka danga mokokdaksüi asaya arudar.

Quarterfinal nung lai ace pezü agütsü, 28 winners aser double fault ana dang mena.

"Ni kanga junga serve sütetba ajanga temulung ajema meblem, anungji ni kanga pelar," ta Maria Sharapova-i ashi.

"Küna tesüiba mapang nung khen danga masayadang, anungji mezüngbuba game trokjibo kati ka tendanger amai liasü. Ni kü sasa junga temang junga ayutsü

meranga liasü, kechiba süra asen temang khen mejungi kümra ibaji lua arutsüji kanga tasaka lir," ta la ita 15 tennis masayai aliba mapang temang koma anepalu ta asüngdangdang lai langzü.

Tesüiba mapang World No 1, Sharapova Honibarnü semifinal nung France tsür Kristina Mladenovic aser Spain tsür Carla Suarez Navarro na rongnung ka den asayatsü.

2016 Australian Open nung la dak meldonium mozü putetba sülen la ranking mali aküm.

Stuttgart, Madrid aser Rome nung la nem wild card agütsüba atema la den toktepertemi ola adok. Canada tsür Eugenie Bouchard-ibo Brihostibarnü la dang 'tashioktsür' ta ashi.

Ajisüaka Russia nungertemibo la pusema liasü.

IPL 2017: KKR-i DD wickets 7 agi akok temaba jenjangi tuogo

Kolkata, April 28 (Agencies) : Tang tasayadak IPL 2017 asayamung nung tanü Honibarnü Kolkata Knight Riders (KKR) aser Delhi Daredevils (DD) na tsüngda asayaa liasü. Iba asaya nung Kolkata Knight Riders (KKR)

telok nungi captain Gautam Gambhir-i runs 71 (not out) aser Robin Uthappa-i runs 59 yangluba ajanga Eden Gardens, Kolkata nung asayaba IPL 2017 asaya 32buba nung parnoki Delhi Daredevils madak wicket 7 agi

takok angu. Iba asaya akoktsü asoshi parnok runs 161 nüngdaka liasü saka parnoki ibaji ball 22 anünga lia ajateta tua iba takok angu. Iba takok ajanga parnok point 14 küma tan IPL nung temaba jenjang tongogo.

5buba Frolic Cup: KSU aser KYC 'B' na final-i iogo

Dimapur, April 28 (TYO) : 5buba Frolic Cup semifinal asayatem tanü Hokolbarnü asayaa liasü aser item asaya nung Khanakhurü Students' Union aser Kuki Youth Club 'B' nati takok ngua asüng, Honibarnü final asayatsü atadar.

Tanü mezüng asaya Tsiepama Youth Organisation (TYO) aser Khanakhurü Students' Union (KSU) na tsüngda asayadang telok anaprongi asaya tenzükli nungi goal agütsütsü meranga asaya meso, ajisüaka shingaia goal meyoctet. TYO puri goal yoktsü maongka timba angu, saka parnoki goal ka danga meyocteti aliba mapang, asaya tenzüker minute 38buba nung KSU telok nungi Rhitso-i agütsüba nall ka Salu-i tekolak agi tongoktsü. Iba sülen KSU-i TYO pur defence kanga junga rakpokasa ball bener alutsü

tenzüker aser tatem nung taoba küm takok marok bena aliba telok tashi maitba küma KSU-i 4-0 agi takok angu. KSU atema tesüsabuba goal asemji Rhitso kija yok. Pai minute 43, 47 aser 76buba tem nung item goal asemji yoka liasü.

Iba asaya nung KSU nungi Anoto yellow card ka achi. Pai TYO atüita ayuba ajanga iba card achitsüsa aküm.

Tanabuba asaya Kuki Youth Club 'B' aser Molvom Youth & Students' Union, MYSU na tasüngda asaya. Iba asayamung asaya aruba rongnung iba telok ana asayaba asaya tajungtiba rongnung ka liasü. Telok anaprongi kanga junga asaya, ajisüaka mezüng goal ji MYSU nungi Haotinlen-i asaya tenzüker minute 6buba nug agütsü. Ajisüaka tajangshi kanga akaba telok, KYC 'B' süngjemshir

asayameso aser minute 21buba nung par telok nungi Ilungrei-i goal ka yoka telok ana 1-1 aküm. Iba goal yoker mapang tatsü ka lir külen KYCB asayartemi kanga kara asayatsü tenzüker aser tatem nug parnok goal 6 yok. Par telok nungi Nyithung-i goal 3 yoka liasü. Pai item goal ji minute 38, 60 aser 82buba tem nung yok. Tanga goal anaji ka Victor-i minute 85buba nung aser kaji Nampi-i minute 88buba nungsa yok.

Iba asaya nung MYSU telok nungi Ngamkho aser Thangminlen na aser KYCB nungia Thangben, Thangte aser Bamdi nungger yellow card achi.

Final asayaji asüng, Honibar nikongdang, 2:00 ako nungi tenzüka asayatsü aser 5buba Frolic Cup 2017 asayamung shibangba sentong nung Dimapur, DC Kesonyü Yhome tetushi tejaoker asütsü.

Imchen Kidong Mungdang...

(TAPAK 1 NUNGI...)



Tanabuba nung; taoba mungdang lemtet nung tuyua aliba ama, Mongsen lipok otsü tarensen Chungliyimti matong dang, koma sobalibaa aru, item otsü bushitsü atema lenmang sadema lapoka yutsür aser iba sentong atema Imchen mungdangi takok tashi yariteptsü lemtet.

Tasembuba nung; Mongsen

kidong balala tarensen lipok otsü tanabuba adok, koba tanü tashi merenemtetü lir, iba kaketji takaratiba nung kaket küma adoktsü atema Mongsener kidong ajaki temulung agüja inyaksü lemtet.

Pezübuba nung; asen meküta aliba aser taküm liruren (bio-diversity) kechisarena melenshiba

lendong nungi kümzüka litettsü atema yimtsüng shia nung arem lushi aser taküm liroren timi wazüka ayutsü asoshi Imchen kidongi yimtsüng shia nung tapet mapa inyaksü renem. Pungububa nung; Hon jubilee nüngo "Imchen Riju" ka Mokochung nung yanglutsü lemteter senshi.

APRIL 29, 2018 ASAYA
Pune VS Bangalore - 4:00 PM
Gujarat VS Mumbai - 8:00 PM
APRIL 28, 2017 ASAYA OSANG
Kolkata-i wickets 7 agi Delhi akok.
Hyderabad-i runs 26 agi Punjab akok.

Mezüngbuba Open Futsal asayamung ayonger

Kohima, April 28 (TYO): Naga Football Club ajanga ayongzüka Mezüngbuba Open Futsal asayamung ya Kohima Local Ground nung May 18 nungi 20 tashi asayatsü sentong lir aser iba asayamung nung takok angur nem sempet sen aika agütsütsü.

Telesa balala nung akoker nem sempet sen 58,500 agütsütsü, ta Naga FC ajanga sangdong ka nung ashi. Iba asayamung nung mezüng jenjang angur nem sen 30,000, tanabuba jenjang angur nem sen 20,000 aser Semi-Final nung

tsüker telok anaprong nem sen 5000 agütsütsü. Best Player nem sen 1500, Best Goalkeeper nem sen 1000 aser goal timba agütsüteter nem sen 1000 agütsütsü, ta asayamung ayongertemi ashi.

Iba asayamung asoshi 'entry fee' sen 2000 agütsü aser Kohima Sports World nung form angutsü. Asayamung dak sendakba osangtem tejangja metettsü asoshi Mobile No. 8794245644 aser 9615375536 ajanga tongtepratep asünung ajungtsü, ta Naga FC osang ajanga ashi.

Mezüngbuba Quasar Open Table Tennis Tournament osang

Kohima, April 28 (TYO): Nehru Youva Kendra Sangathan kübok Quasar Club Kohima aser Kohima District Table Tennis Association (KDTTA) külemi Mezüngbuba Quasar Open Table Tennis asayamung sentong tanü T.T Stadium, Kohima nung "Education Through Sports" omen nung ajemdaker tenzüko.

Kohima district kübok kaket reju balala nungi asayar tetsür aser tebur nisung 36-i iba asayamung nung shilem agidar. Iba asayamung indang final ya April 29, anepdang 9:00 ako

nungi tenzüka asayatsü. Telok asaya nung tetsürtem final asaya Model Higher Secondary School aser Mezhiir Higher Secondary School tsüngda asayatsü. Teburtem final asaya Model Higher Secondary School aser G. Rio Higher School tsüngda asayatsü.

Iba asayamung tembangba sentong ya nikongdang 3:00 ako nungi tenzüksü aser Nehru Youva Kendra Sangathan nung District Youth Coordinator, John Makhabo tongti tesemdang asütsü.

EVERYONE FEELS THE PAIN!

Oajm
FAST RELIEF FROM PAIN

A Product of LIVSAV Group
CUSTOMER CARE- 0250-6580183

BILEM DANGANG

"Na aliba tesem nungi ayamesoang. Nü teka nung aliba amshiang. Nai akokba inyakang."